

من كوكب تاني



نهلة هنو



من كوكب تاني

نهلة هنو

كوتوبنا
KOTOBNA



من كوكب تاني: نهلة هنو

رقم الإيداع: ٢٠١٩/٢٧٤١٠

ردمك: 978-977-6767-70-6

تصميم الغلاف: ناهد منصور

إن منصة كتبنا للنشر الشخصي غير مسؤولة عن آراء المؤلف وأفكاره، وتعتبر الآراء الواردة في هذا الكتاب عن آراء المؤلف ولا تعبر بالضرورة عن آراء المنصة والعاملين فيها.

إهداء

لى زوجى الغالى
الحاضر... الغائب

- ٤.....مقدمة.....
- ٦.....القوالب.....
- ٩.....التربية.....
- ١١.....الدرس.....
- ١٨.....أسوأ مركز في دنيا الرياضة.....
- ٢٢.....الزمالك ليه.....
- ٢٦.....عجائب الكون.....
- ٣١.....في أعماق المطبخ.....
- ٣٧.....المساطيل.....
- ٤٥.....الزوجة العاقلة.....
- ٤٨.....الحكيم في الجمرك.....
- ٥٢.....الشغل.....
- ٥٥.....المشهد.....
- ٥٩.....التخصصات الدقيقة.....
- ٦٥.....أومان!.....
- ٧٠.....مخلوقات فضائية.....
- ٧٢.....عقدة الكلب.....
- ٧٧.....حكاية أغنية.....
- ٨١.....السوبرهيرو.....
- ٨٤.....الزيارة.....
- ٨٨.....رمضان جانا.....
- ٩١.....بحب السيما ١.....
- ٩٧.....بحب السيما ٢.....

- ١٠١..... في ذكرى رحيل والدي.....
- ١٠٨..... دخول إيكيا مش زي خروجها.....
- ١١٢..... السيرك.....
- ١١٤..... عروستي.....
- ١١٧..... ربنا يحب فيكي خلقه.....
- ١٢٠..... في حب حسين السيد
- ١٢٢..... أنت القلب الكبير.....

مقدمة

طول عمري عندي إحساس إني «مختلفة».

مش متأكدة لو الأختلاف دا كان سببه أي دائماً وأبداً بتصرف بطبيعتي،
ومن غير ما أقلق من رأي الناس فيا أو أحاول أكسب رضاهم، ولا الموضوع
بالنسبة لي كان عند، وحب لدور الشريك المخالف؟
فمثلاً:

كان مفروض أحب اللعب بالعرائس؟ أنا كنت بفضل
العاب بلي

الحساب والرياضيات دول أصعب مواد؟ دول كانوا من المواد القليلة
اللي كنت فالحة فيهم

فاتن حمامة سيدة الشاشة العربية؟ فنانة كبيرة، بس انا
ممثلي المفضلة هي سعاد حسني
كلكم بتشجعوا الأهلي؟ بيب بيب زمالك

ستات العيلة أكلهم لا يعلى عليه؟ بيني وبين المطبخ ما صنع الحداد
الرقص الشرقي في دم كل مصرية؟ واضح إني ما عنديش

دم

بختصار، أنا خلف خلاف المحامي على طول الخط

وجايز إن علاقتي بالكتابة تكون أنطلقت من رغبتني إني ألاقني في
الكتب شخصية شهي، تظمني إن عدم مطابقتي للساريو تايب للبننت
ثم للست العاملة والزوجة والام المصرية لايعني أن فيا حاجة غلط، وإنما

معناه إني الاستثناء اللي بيثبت القاعدة.

ولما فشلت في إيجاد بنت أو ست واحدة شبهني في الروايات والقصص، قلت ما بدهاش، وقررت أني أكتب عني، وبعدين جمعت القصص في كتاب، علشان أبقى أشتريه، وأقراه، وأجري وأصرخ زي أرخميدس: وجدتها، وجدتها، أخيراً لقيت واحدة شبهني!!

للأسف، بعد ما قرأت اللي أنا كتبتة، إكتشفت، إني مش بس مختلفة، لا دا أنا في الغالب ”من كوكب تاني“.



القبالب

بحاول أفتكّر، إمتى أول مرة أحس فيها إني مختلفة عن
الناس الي حواليا؟

أكيد الإحساس دا متبلورث، إلا عند التينز، يعني ١٣
وطالع، بس بمناسبة التينز، الصيف دا، التين كان تحفة!! أنا
بتكلم عن التين البرشومي، ومش هأقدر أفيدكم بالنسبة للتين
الشوي، لأني عمري ما دقته، ماما محرماه تحريم الأكل
والشرب في نهار رمضان، لأ دي محرماه تحريم مؤبد، علشان
بيتاكل في الشارع من غير ما يتغسل، ومن غير ما يتعالج
كيماويًا بالبرمنجنات، وبعدين ياخذ حمام محترم، زي باقي
الخضراوات والفاكهة، الي أكيد حد دعا عليها، فدخلت بيتنا.
مش قتلكووا مختلفة؟ مين بيكون بيتكلم عن طفولته،
وبعد أقل من خمس ثواني مخه يشت، وبيتي يتكلم عن
التين، ورمضان، والمطهرات، والوسوسة المرضية الي متفشية
في العائلة الكريمة؟؟

ححاول أركز وأتكلم على نوع تاني من الاختلاف، وهو
عدم مطابقة تصرفاتي للصورة النمطية المتوقعة مني.

من أقدم ذكرياتي مناقشات ماما وبابا عن المدرسة الي
هدخل حضانتها. مش حأفشر عليكم وأقول إني فاكرة النقاش.
بس واضح إني كنت سعيدة بيه، لإني كنت محوره. فاكرة
كمان إن بابا هو الي قاللي إنهم قرروا يدخلوني المدرسة

الشهيرة فكتوريا كوليدج، وعلشان يطمني قال: إنه له قريبة بتدرس هناك، فحتخلي بالها عليًا.

دلوقت حالًا وأنا بأكتب، أول مرة أتساءل: يا ترى ليه بابا هو اللي بلغني بالقرار؟ ماما مكنتش موافقة؟ علشان فكتوريا في الأساس مدرسة أولاد؟ مفتكرش دا السبب. أنا أهلي عمرهم ما حسسونا بحكاية ولد وبنت دي أبدًا، وكانوا متفتحين جدا. بس جايز علشان ماما رقيقة ومالهاش في لعب وعنق الأولاد، خافت عليا، لإني كنت هادئة جدًا في البيت، وكان مش ممكن تتخيل اللي حيحصل بعد شهر قليلة.

برضه بابا اللي نداني، وبلغني إنهم قرروا يودوني مدرسة تانية حتبسط فيها أكثر!! بعدين بقى؟ حنهزر ولا إيه؟ حضانة دي سنة مهمة، عايزة أركز، وكمان عملت أصحاب؛ أغلبهم أولاد. بس دا عادي علشان هم الغالبية في الفصل. عمومًا مش مشكلة؛ مش حزعلكوا. أنا متأكدة من حبكم، وواثقة فيكم. يلا بينا على الـ E.G.C.

سنين طويلة عدت قبل ما أعرف السر ورا قرار أهلي دا. قريبة بابا اللي مفروض تحميني وتخلي بالها عليًا هي اللي إتصلت بيهم، ووصتهم يحولوني مدرسة بنات، لإني قال إيه شقية جدًا، وطول اليوم بألعب مع الأولاد. أمال أنتم حطينهم في الفصل ديكور يعني؟؟ وإدعت إن مدرسة فصلي، مش عارفة تسيطر على الفصل من ساعة ما أنا شرفت. نفسي أفكر أنا كنت بعمل إيه بالظبط علشان المدرسة المفترية دي تقول عليًا الكلام دا!

ولإن ربنا هو الرزاق؛ وبالرغم من إن الاولاد هنا عددهم أقل كتير من البنات، رزقني في الـ E.G.C بشلة أولاد أشقى

من كل أولاد فيكتوريا؛ بأعترهم أصحابي وزبي إخواني لحد النهاردة. أحمدك يارب.

أفكر الفكرة اللي عايزة أقولها هي إني من صغري بأرفض القوالب الجاهزة، ومقتنعة إن دا صح طول ماتصرفاتي مافيهاش أذية لغيري. بس المشكلة هي إن الناس - و بسبب فناعاتي وتصرفاتي - برضه عايزين يحطوني في قالب؛ فمرة يقولوا عليًا توم بوي، علشان بأحب ألعب فيها حركة وشقاوة؛ ومرة شضية علشان مبسيش حقي؛ ومرة خجولة علشان مبتكلمش كثير؛ ومرة انطوائية علشان بحب القراءة؛ ومرة موسوسة علشان بحب النظافة؛ ومرة؛ ومرة.

بس ولا تفرق معايا، خليههم هم يعملوا قوالب براحتهم؛ وأنا كمان حأفضل أكسرهما لهم براحتي، ولما نشوف مين اللي حيكسب.



التربية

لما عمري كان تسع سنين، بابا سألني لو أحب أشترك في فريق السباحة في نادي سبورتنج. ولما لقاني مرحة بالفكرة، أخذني في يوم للتدريب. وطلب من المدربين اختباري. ولما نجحت، ضموني للفريق، وطلبوا مني الحضور للتدريب مرتين يوميًا.

ولإن الدنيا كانت أمان، ماما وبابا إتفقوا إني أروح للنادي بالترام، وقعدوا معايا ، يقولولي النصائح الي كل الأهل بيقولوها لأولادهم في المناسبات دي ، زي: ما تركيش الترام أو تنزلي منها إلا لو الترام واقف تمام ومبيتحركش. ماتقفيش جنب السلم. خللي بالك على نفسك وعلى شنطتك. متخليش حد يلزق فيكي أو يمسكك بأي طريقة ، إلخ إلخ.

بس كمان فاكرة كويس أوي، إن ماما قالتلي، لو الترام زحمة، وإنتي قاعدة، وطلع حد أكبر منك. تقفي وتخليهم هم يقعدوا، ومن كتر ما كررت النصيحة دي، جالي إحساس إن دي أهم نصيحة، وكنت حريصة جدًا على تنفيذها.

للأسف، تربية أهلي دي سببت لي مشكلتين.

أول مشكلة، هي إني لسه بأطبق نصايحهم لحد النهاردة، ولأني حاليًا مش بركب مواصلات عامة إلا وأنا مسافرة، وفي الغالب بيكون معايا حد من أولادي، فبلاقيهم بيتسموا لما يشوفوني وقفت علشان أقعد حد مكاني، لإن الشخص دا في

أغلب الأوقات بيكون أصغر مني. بس أنا اللي مش واخدة
بالي إني كبرت، وإني مش لسة الطفلة بنت التسع سنين اللي
بتركب الترام للنادي كل يوم. ومن كسفتي، بابتدي أقولهم أي
حجج تيجي في بالي، زي:
أصل الراجل كان شكله تعبان أو مريض.

مع إني لما دقت فيه، لقيت جسمه نسخة من
شوارتسنيجر، لما كان بطل العالم في كمال الأجسام.
أو لما وقفت لواحدة ولقيت بنتي بتضحك ضحكة خبيثة،
قتلها :

أنا عارفة إنها أصغر مني، بس أصلي إفتكرتها حامل.
ويا ترى، ياماما عرفتي إزاي؟ دي بطنها أصغر بطن بين كل
ركاب الصب واي؟
أصلي سايكك.

والمشكلة الثانية والأهم، هي إني لما بكون فعلاً تعبانة
أو ضهري واجعني، واركب موصلات عامة، أو الأوتوبيس
الي بيوصلنا للطيارة، وألاقي شباب صغير قاعد ومبيقفش،
فعلاً بتترفز، ويبقى نفسى أديهم قلمين، أو على الأقل درس
من دروس أهلي ليا. بس طبعاً بكنتم في قلبي وأنا متضايقة،
وباكتفي بنظرة كلها لوم، لعل وعسى يحسوا على دمهم.

عادة الزغرة مبتجيش أي نتيجة، بس لما حد بيعبرني
ويقوم، ويقعدني مكانه، بشكره من كل قلبي، وبدعي له
ولأهله اللي ربوه، ربنا يحميهم، ويكثر من أمثالهم.

الدرس

أجيالي من مدرسة الـ E.G.C بالإسكندرية، عندهم علاقة حب واحترام

وتقدير، بالإضافة إلى خوف من ناظرة المدرسة: Mrs. Ann Khalafallah.

أنا شخصياً عندي ذكريات كثيرة معاه، ودي علامة ممكن تكون إيجابية، وممكن تكون سلبية، لأنها- كناظرة- تعاملها الشخصي مع الطلاب، بيبكون فقط مع المتفوقين، أو مع لا مؤاخذة، عكسهم.

علشان السبسبس والذي منه، حسيبكم تكتشفوا أنا كنت من دول، ولا من هؤلاء.

أفكر الشقاوة كانت جوايا من زمان، بس لإني كنت وحيدة لأكثر من خمس سنين، ولإن اختي بعد وصولها بالسلامة كانت جري جيرل أوي، اضطريت أحوش الشقاوة كلها للمدرسة.

اكتشفت بسرعة جداً، إن اللعب مع الأولاد أظرف كثير من لعب البنات، واكتشف الأولاد إني في نفس شطارتهم في الجري والكرة والبلي، فكانوا بيرحبوا بيّا ألعب معاهم، وكمان ضموني لواحدة من أقوى شلتين في صفنا.

من قوانين المدرسة الي عجبتني جداً، إن الأولاد ممنوع يضربوا البنات، وعمر ما حد كمل صياغة القانون، أعتقد إنهم ما إتخيلوش إن العكس وارد، ودي الثغرة الي أنا دخلت منها، واستغليتها أسوأ استغلال (بأعذر بشدة لكل الزملاء

المحترمين الي ضربتهم ومابلغوش عني).

مش عارفة ليه حاسة أني بأحكي طفولة مجرم من نوعية بابلو أسكوبار، أكبر تاجر مخدرات في كولومبيا، مش واحدة مهندسة كمبيوتر محترمة، وزوجة وأم، وجدة كمان.

المهم إني لحد آخر الابتدائية، كنت تحت رادار مسز خلف الله، أولًا لإن صعب أعمل مصيبة كبيرة وأنا في عمر الزهور دا، وكمان لإن فصولنا كانت بعيدة عن المبنى الرئيسي، الي فيه مكتبها.

وانتقلت لإعدادي، وكان فصلنا في الدور الأرضي، ويطل على الحديقة الكبيرة، وعلى بعد خطوات من الجيم أو صالة الألعاب، وكمان على بعد أمتار من حمام السباحة، يعني موقع استراتيجي، خصوصًا لواحدة رياضية وسباحة زيي.

كان معايا في الفصل خيرة الشباب والشابات، أبطال المدرسة في البلي، والمسّاكة، والموسيقى، الي إقتصرت على التطبيل على الدسك، والغناء للمدرسة، أقصد مدرسة الزمالك؛ يا زمالك يا مدرسة، لعب وفن وهندسة . للتذكرة، إحنا بنتكلم عن أيام حسن حلمي رئيسًا وشحاتة وجعفر وبصري لعيبة ومحمد لطيف مذيغًا. خيلنا في المهم، في يوم مُدرسة الفصل غابت واتأخروا في إرسال بديلة لها، فالظاهر اندمجنا زيادة عن اللزوم، وصوتنا غطى على صوت المُدرسة في الفصل الي جنبنا، فدخلت علينا وقالت إنها طالعة تشتكيننا لمسز خلف الله. واضح إنها كانت أهلوية!! وبعدين

المدرسة عملت حاجة عجيبة جدًّا، قفلت علينا الباب من برة بالمفتاح، قال إيه!! علشان مانهرش.

مش فاكرة مين كان صاحب اقتراح الهروب عن طريق الشباك، بس أكيد كان عنده ملكة الإقناع لإن البويز فتحوا شباك، وبدأوا ينطوا واحد ورا التاني في الجنية. طبعًا الجيرلي جيرلز ماأتحركوش، أولًا لإنهم مش أعضاء في الباند الموسيقية، وثانيًا لإنهم مش حيعرفوا ينطوا وهم لابسين سكيرتس. أما انا، وبتنين كمان من الشلة، فكانت على راسنا بطحة، وعارفين انا عاملين عملة مهبية. بس الحمد لله، لزوم الشقاوة، كُنا لابسين شورتات تحت السكيرتس، فمافيش أي حاجة تمنعنا إننا نط وراء أصدقائنا البويز.

أول واحدة نطت، الثانية وراها، وجه دوري، رحت نطة. بس حصل حاجة عجيبة جدًّا، حطمت قانون الجاذبية!! فضلت معلقة في الهواء، ولا أنا جوة الفصل، ولا أنا واقفة على أرض الحديقة!!!

صحيح أنا عندي مواهب رياضية كثير، ضمننت احترام البويز ليا، بس الانبهار الي على وشهم وهم بيحاولوا يفهموا أنا عملت معجزة التحليق في الهواء دي إزاي، كانت تدعو للفخر .

أخيرًا، سمعت برطمة إنجليزي من جوه الفصل، وبعدين لقيت مسز خلف الله والمدرسة الأهلية، ماسكائي من قفايا، ويحاولوا يخلصوا الشورت بتاعي، من شنكل الشباك!! حقيقي متانة شناكل وشورتات زمان مافيش منها الأيام دي خالص.

بعد حادثة المعجزة، مسز خلف الله قررت تنقلنا للفصل اللي لازم
في مكتبها، في الدور الثاني:

في ثلاث نظريات:

١. تبرگًا بكراماتي

٢. علشان لو نطينا تاني من الشباك، تخلص مننا للأبد.

٣. علشان نظريًا، لما تبقى جنبنا، شقاوتنا حتقل.

الظاهر إن النظرية الثالثة هي اللي صحيحة، لإننا فعلاً
قررنا نلايها، ونحترم نفسنا شوية، على الأقل لمدة يوم أو
اثنين .

في اليوم الرابع، دخلت علينا وإحنا في نص بروفة أغنيتنا
الجديدة، وبكل أدب طلبت مننا نلغي البروفات، لإن وكيل
الوزارة حيزورها في مكتبها، وفعلاً بطلنا تطييل وغنا، وقعدنا
نفكر ممكن نعمل إيه، خصوصاً إنه ولمحاسن الصدف،
مُدرة الفصل كانت متأخرة.

استقرينا على أننا نلعب بنج بونج، أظن مافيش أهدي من كدة
رياضة؟ بس نظرًا إن مافيش تراييزة بنج في الفصل، ولا مضارب، قلنا نلعب
على الحيطه زي السكواش، ونستعمل كفوفنا بدل المضارب.

اخترنا الحيطه الفاضية في آخر الفصل، وابتدينا الماتش.

تك تك تك... ١-٠

تك تك... ٢-٠

تك تك تك... ٢-١

تك تك تك تك... ٣-١

.....

تك تك تك... ١١ - ١٦

- تايم أوت!! مسز خلف الله جاية !!

رجعنا قعدنا في أماكننا وبراءة الأطفال في عيوننا، دخلت علينا والشار طالع من عندها.

- @\$;:&&@;:;\$&@;:;\$&@;)@&\$ كبر الترجمة:كلام

ملخصه :

- ماكنش العشم!! بقى أنا اطلب منكم تتهدوا لمدة نص ساعة لحد مالزوار ما يمشوا، تقوموا تقعدوا تخبطوا على الحيطه تك تك تك، لما ربيتولي أنا والزوار الخفيف!!

-

!!!Those who were knocking on the wall!!! STAND UP

....

!!I'm still waiting

....

NAKHLA!! Was it you?

الحقيقة أنا مردتش لإني بجد كنت فاكراها بتكلم النخلة اللي برا الشباك.

Fine!! The whole class will

واحدة دحيحة وعمرها ما أتذنبت في تاريخها المدرسي

خافت على سمعتها واتسحبت من لسانها وقالت:

-Mrs. Khalafallah!!!

- شششش اسكتي.

- لأ، مش حسكت -

It was Nahla, Walid, Suzy, & Amr

- رحنا بلاش.

Excuse me miss. I don't remember asking you to tell on your classmates. Did I?

الترجمة: حد سألك يا باردة؟

No Mrs. Khalafallah, but

No buts. Unfortunately, you leave me no choice but to punish you.

As for you little devils, you're off the hook

الترجمة: طيب عند فيكي، أنت اللي حتتذنبني وهم لأ..
مش حتترجم hook علشان اتعقدت من الشناكل.

الله عليكي، يا مسز خلف الله. إيه الحلاوة دي؟

Three cheers for Mrs. Khalaf

ENOUGH!!

ومن يومها اتعلمت الدرس وعمري ما نسيته، اعمل كل مصيبة والثانية براحتي بس عمري ماأفتن على شركائي في الجريمة أبداً.

لأ، نتكلم جد شوية، الدرس الحقيقي هو أن الشقاوة بأدب
مش جريمة، لكن الأناية وأذية الغير هي الي غير مقبولة
وتستحق العقاب. وأنا ولله الحمد، ربيت ولادي على كدة،
علشان كدة، مهما أتشاقى، عمرهم ما بيفتنوا عليا لأبوهم.
الله يرحمك يامسز خلف الله، والله يسامحك يا فتانة.



أسوأ مركز في دنيا الرياضة

زي ما ذكرت في الحكاية السابقة عن طفولتي المشردة في ال EGC، كنت شاطرة في الرياضة، ودا بيشمل كل الألعاب الرياضية وكمان في الجبر والحساب. أما باقي المواد، فكنت يادوب بعدي، ببركة دعاء الوالدين.

كانت حصة الـ PT أحب حصة لقلبي، وخصوصا في الصيف، علشان بتكون حصة سباحة، وفرحت جداً لما المدرسة- أفتكر كان اسمها مس ترندل- حطتني في فريق الأولاد، وسعادتي كملت، لما سبقتهم في المسابقات!!

في غير الصيف، كنت بلعب كل الرياضات الي ممكن اشترك فيها، فولي ، باسكت، تنس، وأفتكر كمان جربت الهوكي. للأسف، كرة القدم النسائية مكانتش معروفة في الوقت ده، بس الرياضة الوحيدة الي عقدتني، ووقفت عقبة في طريقي إلى الأولمبيات، أو إني أحقق بطولات لمصر زي نور الشرييني أو فريدة عثمان أو حتى محمد صلاح، هي كرة اليد.

مش فاكرة مين الشخصية المؤذية الي اقترحت عليا انضم لفريق المدرسة. مسز ابتسام رحبت بييا وقالت إن أكثر مركز محتاجة لي فيه هو، حارس المرمي.

وافقت، وأفتكرتها بتحبني، وبتعاملي معاملة خاصة لشطارتي في الألعاب الثانية، لأنها اختارت لي مركز مريح، مش محتاجة أفضل أجري

رايح جاي في الملعب زي باقي الفريق. لكن حاقف في المرمى معززة مكرمة، ولما الفريق الثاني يبقى يزهق من حذف الكورة لبعض، ويرميها ناحيتي، أبقى أمسكها أو أصدها.

كمان عجبتي جداً حكاية إن في منطقة حول المرمى، ممنوع أي حد ثاني يدخل فيها، يعني زي حظر تجول للفريقين، إلا أنا، انا بس اللي مسموح لي أتفسح فيها براحتي.

كل دا خلاي أوافق على المركز، وفعلاً إنضميت للفريق ولعبنا مباريات ضد مدارس تانية، وكسبناها كلها بسهولة، لأن فريقنا كان قوي، في الهجوم والدفاع. ودا كان معناه إن الكور اللي بتوصلي، قليلة جداً؛ يعني تقدرروا تقولوا، كنت زي موظفين البطالة المقنعة.

وفي يوم مشهود، كانت نهائيات بطولة المدارس، أخذت مركزي داخل منطقتي المحظورة، وكنت واثقة في إمكانيات فريقي، وفي الفوز.

لكن لما شفت الفريق الثاني شعرت ببعض القلق، شكلهم متغذيين كويس، وواخدين الموضوع جد، وكمان شبهت عليهم، كإني شفتم قبل كدة، بس مخدتش في بالي. وصفر الحكم، وياريته ماصفر. هجوم شرس بلا هوادة، وعنف وزق وضرب، وأصوات مخيفة وصيحات، وهجوم من اليمين، ومن اليسار، ومن الوسط.

أيوه أيوه إفتكرت أنا شفت الفريق دا فين قبل كده. في كتاب التاريخ، درس المغول!!

معنى كده إن مُدرّسة التاريخ، اللي كانت دائماً تسمعي كلام بايخ علشان مش بأركز معاه، ولا بأحفظ دروسي، ولا

بأفتح كتاب التاريخ أصلاً، ظلمتني، لإني كنت بتفرج على الصور.

نرجع للماتش، أحفاد جنكيزخان، قصدي الفريق الثاني، استمروا في الهجوم. وكان الجول بتاعي، هو آخر حصن في طريقهم قبل دخول بغداد.

واضح إن أعضاء فريقني جالهم حالة ذهول، وخوف من السحل وسلخ فروة الرأس، خلاهم يتقهقروا ومايعملوش أي مجهود في صد الغزو التتاري، والنتيجة هي إني كل شوية ألاقي نفسي وجها لوجه مع هولاكو، اللي متنكر في فانلة نمرة ٧، وعمال يقذف الكورة ناحيتي، بالمنجنيق.

للأسف، أخذت الموضوع على كرامتي، وقررت أذود عن المرمى بكل بسالة علشان مانخسرش البطولة، وحاولت أصد قذائف الأعداء، بإيديه أو رجليه أو حتى بطني!!

بعد عدة غزوات، ومش عارفة من الوجع أو من الخضة، لما لقيت إن جسمي بقى شبه الكلاب الدالميشن، كله بقع غامقة، من خبطة كورة اليد اللي زي الطوبة، خرجت عن شعوري!!

أفكر الحادثة دي كانت قبل إذاعة حلقات الـ Incredible Hulk، فمعنى كدة إن أنا اول واحدة يحصلها التحول اللي بيحصله لما حد ينفزه. بس بدل ماأقلب أخضر، قلبت أزرق من كتر الكدمات.

الي حصل بعد كدة مش واضح أوي في ذاكرتي؛ في الغالب من كتر الكور اللي جت في دماغي. لكن كل اللي فاكره، إني رفعت منديل أبيض كان معايا في جيب الشورت،

وبخطوة عسكرية، لزوم الموقف، سبت الجول، واتجهت
لمنتصف الملعب، وقَعَدت أزعق وأشوح وأبرطم بكلام متنقي
من قاموس «صدفة بعطشي»، لزميلاتي في الفريق، ولجيش
المغول، وللحكم كمان.

بعدين رحت للمُدْرسة على الخط، وطلبت منها إنها تنزل
الحارس الاحتياطي مكاني، لإني غضبت ومش لاعبة، وحتى
لما قالتي إن الحارس الاحتياطي مصابة، وإن مافيش حد
غيري يكمل المباراة، صممت على قراري، وملت حاجتي،
وروحت!!

صحيح أنا أتمنعت من المشاركة في أي فريق رياضي للمدرسة
بعد كده، لكن مش ندمانة بتاتاً، أصل العمر مش بعزقة!!

وعلى فكرة، لحد دلوقت، ما عنديش أي فكرة عن نتيجة الموقعة
المصرية دي. بس في الغالب عدت على خير لأن بعد شهرين، اتنين من
الفريق ظهروا تاني في المدرسة، وقدرت أتعرف عليهم، من تحت الشاش
والجيس.

نصيحة أخيرة، اللي عنده أي حد مطلع عينه، ومش قادر عليه، وعازب
يربيه؛ يعني مثلاً، رئيس غلس في الشغل؛ حماه قرشانة، زوج مبصباتي...
إلخ، إقنعوهم يقفوا جول في فريق الهاند بول، وإبقوا إدعولي.

الزمالك ليه؟

ناس كتير، خاصة اللي بيتوسموا فيه، كوب من العقل، ومعلقة صغيرة من الموضوعية، ورشة مفهومية، بيسألوني: إنت ليه زمالكوية؟ البوست دا محاولة مني للرد على السؤال ده؛ من غير تعصب أعمى، ولكن بسرد وقائع حقيقية وأحداث، أدت لتنصبي لنفسي، ككبيرة مشجعي الزمالك.

والدي كان رياضي، بس كان مالوش في الكورة، ومايتفرجش إلا على المنتخب. فلما انضميت لفريق السباحة في نادي سبورتنج، بقى انتمائي الوحيد للنادي السكندري العريق.

بعد أقل من شهر من انضمامي للفريق، استضاف سبورتنج فريق الزمالك للسباحة، ومر أغلب اللقاء بدون أي أحداث تستحق الذكر، غير إن الروح الرياضية الحقة والود، كانوا السمة الواضحة لليوم.

في المسابقات الفردية، الحمد لله كسبت سباقين الـ 50 و 100 متر حرة تحت 10 سنين، وشفيت السعادة والفخر على وجوه أبويا وأمي وحتى اختي اللي كان عندها 5 سنين، لكن ماشفتش أي حاجة على وش المدرب غير التكبيرة المعتادة، اللي من غير كلام بتقول: ماتفرحيش بشبابك أوي، كان ممكن عملي رقم أحسن من كدة.

وبدأت سباقات التتابع 50 متر متنوع، وأنا اللي حنهني السباق، عشان

تخصصي السباحة الحرة. وقفت أنا وزميلتي سباحة الفراشة عند آخر الحمام، منتظرين وصول سباحة الظهر.

السباحتين من سبورتنج والزمالك لسباحة الظهر وصلوا عندنا مع بعض، وبدأت في تشجيع زميلتي سباحة الفراشة. وبعدها سباحة الصدر الي كانت برضه على خط موازي لسباحة الزمالك ، عند خط الـ 25 متر.

وفجأة، بدأت تتأخر عن سباحة الزمالك، ووشها كان باين عليه الألم، ففهمت إنها جالها كرامب، بس أكيد خافت تتسحب خوفاً من البعبع، قصدي من كابتن إسلام المدرب. وصلت سباحة الزمالك، وقبل ما زميلتها سباحة الحرة ما تنط لإنهاء السباق، قالتلي: هارد لك، ياكابتن.

مش عارفة لو اللفته اللطيفة، ولا كلمة كابتن الي أول مرة حد يقولهالي، هي الي فعلاً أثلجت قلبي، ومابقتش زعلانة إننا حنخسر السباق. بس طمأنت نفسي إنه لو مش مكتوبلنا نكسب، فعلى الأقل السباحة المحترمة دي هي الي حتكسب. أختي كانت واقفة ورايا تشجعني، وبعدين الظاهر حاولت تقعد على البكر الكبير الي بيلفوا عليه الجبال الي بتحدد حارات السباحة، فالبكر لف بيها ووقعها، وابتدت تعيط.

للحظة، بس فكرت أطنشها لإن زميلتي كانت قربت توصل، زي ما قاللي الشيطان الكرتوون الصغير الي ظهر على كتفي الشمال. بس الملاك الكرتوون الصغير الي ظهر على الكتف اليمين قاللي: عيب عليك، أختك أهم من ميت

سباق، ومن زعل البعبع.

وفعلًا جريت أساعدها، وخلصتها من الحبال اللي لفت عليها، وإطمنت إنها بخير، ورجعت لمكاني في نفس اللحظة اللي زميلتي وصلت فيها. هي لمست الحيطه، وانا نظيت، وكل اللي في بالي، إني أسبح بأقصى سرعة علشان أسجل رقم شخصي جديد اصالح بيه كابتن إسلام، وأعوضه عن خسارة السباق، وعن تركي لمكاني ثواني قبل وصول زميلتي.

عند نصف الحمام، ابتديت ألاحظ إن الجمهور اللي حوالين الحمام بيشجعني، وسباحين سبورتنج بيلفوا فوطهم زي فهد بلان وهو بيغني واشرحلها، وفي صوت دوشة هايلة كل ما أطلع وشي أتنفس.

فرحت إن في حد معبرني ويشجعني بالرغم من الظروف العصيبة للسباق، وسبحت بحماس وطاقة عمرها ما اتكررت معايا، لحد ما، معرفش إزاي، لقيت نفسي قربت من سباحة الزمالك.

أكيد هي إطمأنت على الفوز وماسبحتش بكل سرعتها، فقدرت أحصلها، وفي آخر لحظة لمست النهاية قبلها.

فرحت جدًّا بهتاف فريقي ومشجعين سبورتنج، بس اللي ماتوقعتهوش، واللي والدي حكتهولي لما طلعت من المية، هو إن فريق الزمالك بالكامل كان كمان يشجعني.

بهرتني الروح الرياضية العالية، وقررت أرد الجميل، وأشجع الزمالك، إلا في لقاءه ضد سبورتنج.

وسافرت مع الفريق إلى القاهرة، لحضور سباقات
الجمهورية .

المنافسة الحقيقية للفوز البطولة، كانت بين الجزيرة
والأهلي. بس للأسف، الروح الرياضية كانت غائبة، ولما
الجزيرة فاز بالسباق الي يضمه البطولة، حصلت خناقة،
و ضرب، وسمعت مساعد مدربنا، كابتن عبداللطيف الزمكاوي
يقول: همّة الأهلية كده، يا يكسبوا، يا يبوظوا الماتش.
ومن يومها، بقيت بحب الزمالك، وماليش في الأهلي دا
بتأنا.

صحيح الزمالك بقاله سنين مفرح فينا الأعادي،
لكن..... سنظل أوفياء.



عجائب الكون

من الكوابيس المتكررة لناس كثير كابوس الامتحان والرعب الأزلي الي بيصيههم لما يكتشفوا إنه برغم من إنهم مذاكرين، لكن مش عارفين يجاوبوا أي سؤال، وإنهم واخدين صفر لامحالة.

أنا شخصيا شفت الكابوس دا، و فاكره كويس جدًا، لأنه لما حصل لي، مكنتش نايمه. أيوه، كنت في امتحان بجد.

إعدادي هندسة؛ وكنت اكتشفت بعد أول يوم دراسة إن الفكرة الي كانت في راسي عن الجامعة مالهاش أي علاقة بالحقيقة المرة الي لقيت نفسي عايشة فيها.

المحاضرات كانت بالعربي، ودي كانت مشكلة لي ولخريجي مدارس اللغات، لإننا مدرسناش الرياضة بالعربي قبل كده... فمكناش بنفهم أي حاجة في المحاضرات!! الغريب إني بالرغم من كده، عمري مافوت أي محاضرة!!

المهم كان عندنا مادة اسمها هندسة وصفية، وكنت بمساعدة والدي (الله يرحمه) فهمتها وحتى حبيتها. وفي يوم امتحان نص السنة الشفوي، كنت داخله وأنا فرحانة بشبابي لأنني مذاكرة كويس، وكنت حاسة إني (على رأي إبنني) حدشداش الامتحان!!

كان في اتنين معيدين بيמתحنونا، وكانوا بينادوا علينا اتنين اتنين؛ بترتيب أسامينا الأبجدي. على حظي، نادوا عليًا مع زميلة لي من المدرسة،

لأن إسمها بيتدي بالنون زيي.

فرحت لما المعيدين عرفوا من إسمها إن والدها أستاذ رياضة في الكلية، قلت: كدة هي ضمنت الدرجة النهائية، ويمكن كمان توصيهم عليًا حق العشرة الطويلة في المدرسة. لكن هي أخذت الدرجة النهائية وطارت. عمومًا ما زعلتشي أوي لأني كنت مذاكرة بجد.

الامتحان كان عبارة عن كروت مرسوم عليها أشكال مختلفة، وكل المطلوب كان إننا نعرف إسم الشكل، وبعدين نجابو على شوية أسئلة عن مساحة وحجم الشكل، وحاجات تانية ملهاش أي فائدة في الدنيا.

وقفت أمام المعيدين وكلي «سلف إستيم». سألوني عن إسمي، والحمد لله جاوبت صح. وبعدين معيد منهم قاللي:

ويا ترى حتجاوي بالعربي، ولا سيادتك برضه متدلعة،

وزي باشمهندسة اللي قبلك متعرفيش غير إنجليزي؟

طبعا مش محتاجة أقولكم إن «السلف إستيم» إتبخر في

فمتو تانية، ولقيت لساني انسحب لوحده وبيقول:

- لا، ياباشمهندس. أنا حجاوب بالعربي.

- هايل، اسحبي كارت.

دعيت ربنا أن يجيلي شكل سهل، وفعلاً الكارت اللي

سحبتة كان شكل Cone. فرحت جدًا وقلت: الحمد لله جت

سليمة. لأني مذكراه كويس وأعرف كل معادلاته، وأفتكر إني

كمان أعرف له بدل الكلمة، على الأقل كلمتين بالعربي.

بس المشكلة إني كنت محتارة مين فيهم أنسب في الموقف
المهيب الي أنا فيه دا. استقرّيت على كلمة فيهم وجاوبت
بكل ثقة:

- قرطاس يا باشمهندس!!

- قرطاس؟؟؟ إحنا جاين نبيع لب يا باشمهندسة؟؟؟

للأسف بدل ما ابتسم عشان أشجع المعيد على القفشة
الملعبوة، لقيت شفتي الي تحت عملت شقلاظ وانقلبت
لبرة. وشلال من دموع انفجر ومعرفتش أوقفه.

تدخل المعيد الثاني-الله يكرمه-وهو فطسان من الضحك

وقال:

- معلش يا باشمهندس، دي شكلها مذاكرة بس مخضوضة

شوية، خليني أنا أحاول أساعدها.

- ربنا يخليك يا باشمهندس (شحتفة) اسألني عن أي شكل

تاني (شحتفة).

- لأ، مفيش شكل تاني.

وراح قالب الكارت، فبقى بوز الكون ل فوق.

- ها إيه رأيك؟ عرفتي اسمه كدة؟؟

ابتسامه عريضة:

- آيوه !! كده طرطور؟؟

- لأ، دا إنتي جايه تهرجي معانا بقى!!

وطبعاً مش محتاجة أقولكم إلي حصل بعد كده...

ابتديت أعيط زي سعاد حسني في صغيرة على الحب، لما سمير غانم قالها إنه مش الأستاذ كمال المخرج، ولكن المخرج هو رشدي أباطة اللي إيدها طرقت على خده لما باسها .

الظاهر إن العياط العيالي جاب نتيجة، لأن المعيد شكله إتخض، وخاف إن الطلبة والستاف يتلموا على الصوت، فقال لي:

- هو فيه إيه؟؟ مالك؟؟ طب إهدي وقولي بتعطي ليه؟

قلت وأنا بتشحتف:

- بصراحة، أنا مذاكرة كويس أوي. بس أنا كنت في نفس المدرسة مع زميلتي اللي قبلي، وكنا بناخد كل الرياضة والعلوم بالإنجليزي، والدكتور في المحاضرات قال لنا إننا ممكن نجاب بالعربي أو بالإنجليزي. فمذاكرتش الأشكال بالعربي .

- يعني عارفة اسم الشكل بالإنجليزي؟

طبعا، دا Cone، ومساحته كذا، و حجمه كذا.

مش عارفة إذا كانت الدموع ولا الإجابة الصحيحة هي اللي خلتنى أصعب عليه.

- طيب سماح المرة دي، حأديكي النمرة النهائية، بس حسك عينك أسمعك بتقولي قرطاس ولا طرطور هنا تاني!!

- حاضر، يباشمهندس، ربنا يخلي حضرتك.

- ولعلمك الـ cone بالعربي إسمه مخروط.

كان عندي رغبة شديدة استظرف وأقوله:

- مخروط؟ هو إحنا هنعمل ملوخية يا باشمهندس؟؟؟

بس قلت لنفسي: إمشي من وشه بسرعة قبل ما يغير

رأيه ويسقطك.



في أعماق المطبخ

أنا عندي مشكلة، من ساعة ما رجعت مصر، ولما بأعرف نفسي، وخصوصًا لواحدة ست، وقبل حتى ماتكذب عليًا وتقولي فرصة سعيدة، بتسألني:

إنت أخت ”نرمين هنو“؟

لحد هنا مفيش مشاكل، بالعكس أنا فخورة جدًا بيها، فبارد بفخر وأقول:

- أيوه، أنا أختها.

المشكلة بقى في السؤال التالي:

- وياترى إنت كمان شاطرة زيها كده في المطبخ؟

هنا بقى، بضرب لخمه، ومش بأعرف أجاب، ياترى أكذب عليها وأقول أيوه؟ وبعدين أدعي ربنا إننا عمرنا مانقابل تاني في حياتنا، واحتياطي، ولا حتى في الآخرة؟ أو أكون صريحة وأعترف بالعداوة المستحكمة بيني وبين المطبخ؟ بس ساعتها، محدثي هي اللي بتحتاس، ومابتعرفش ترد على المعلومة الصادمة دي.

وعليه، ولتفادي الإحراج في المستقبل، قررت أعترف لكل من يهمه الأمر.

أقر أنا وأعترف بياني، وبالرغم من إن أمي مشهورة بأكلها الشهي، وإن أختي شيف قد الدنيا، فأنا ما بأعرفش أطبخ!!!...

ليه؟ الله أعلم، بس جايز جتلي تروما بعد الأحداث
المؤسفة دي:

أول ما إتخطبت، قصدي أتخطبت، ولما عرفت إني لما حتجوز حاسيب
مصر. يعني مش حاينفع إن ماما تطبخ وتبعثلي الغدا كل يوم، طلبت منها
إنها كل ما تعمل حاجة أنا بحبها تقولي علشان أقف معاها في المطبخ،
وأتعلم منها أسرار الأكل المصري المسبك والمحمر.

بس سبحان الله، وعلى رأي الست "ليلى مراد"، قلبي
دليلي قالي مش حتبني المطبخ مطلقاً. فلما ماما قالتلي:
تعالى أتعلمي المحشي. قتلها: مش النهاردة، ياماما. علشان
الزمالك حيلعب كمان شوية، وعايضة أركز في الدعاء علشان
مانتغلبش تاني.

ومرة تانية، لما قالتلي: تعالى إتعلمي الملوخية علشان
إنتي بتحبها. إتحتجت بإن عندي امتحان مع إننا كُنا في
أجازة.

أخيراً وفي يوم مفترج، ماما قالتلي: أنا ماكنتش ناوية
أقولك تعالى أتعلمي الطبخ تاني أبداً، بس النهاردة حأعمل
قلقاس مع كمونية، وأنا عارفة قد إيه إنتي بتحبهم. فلو عايضة
تيجي تتفرجي تعالى. لكن لو بطولة الدوري متوقفة على
دعاء سيادتك، أو عندك مذاكرة في الإجازة، براحتك.

مش عارفة إذا كنت مشيت ورا ماما للمطبخ من الإحراج
ولا من حبي في القلقاس؟

المهم إني بصيت لقيت نفسي، الشر برّه وبعيد، في

المطبخ. القلقاس المكعبات كان في مصفاة، والمية نزلة ترخ ترخ من الحنفيه، إتوترت!!

ماما قالتلي أصعب حاجة في القلقاس التخلص من لزوجته، علشان كدة بنشطه وبعدين بنحطه في مية مغلية ونصقيه تاني.

لحد كدة وأنا مركزة جامد جدًا. أي حاجة فيها نظافة بتكون سهلة الفهم.

- وبعدين نحط مية نضيفة في حلة تانية... ونغليها ونعمل شوربة بصلة كبيرة ومكعبات شوربة الفراخ.

ابتديت أتلخبط بس لسه ماشي الحال... ولما البصلة تبقي نص سوى... نحط القلقاس الي اتصفى ومابقاش فيه أي لزوجة. أظن سهل خالص.

رفعت إيدي، فماما قالتلي: إحنا مش في فصل في المدرسة هنا، عايزة إيه؟

رديت وأنا فرحانة بقوة ملاحظتي:

- وبعدين نسيبه على النار لحد مايخضر؟؟

- لو كنتي ناوية عملي كده، ياشطورة كان القلقاس حيتحرق، وجوزك حيندم على اليوم الي إتجوزك فيه. اللون الأخضر ده من الخضرة والكزبرة الي بنضيفها. بنحط تلت كمية الكزبرة الخضراء والثوم والخضرة المسلوقة على القلقاس لما يقرب يستوي، وبعدين نعمل ترقية من باقي الكمية، ونحطها فوقه بعد ما نشيله من على النار.

طبغًا أثناء الوصفة المكلكة دي كنت أنا بقول في راسي:
إنشالله ما أنا ولا جوزي عمرنا أكلنا قلقاس في بيتنا. نبقي
ناكله لما نيجي نزور ماما وبابا.

- ودلوقت وعلى ما القلقاس يستوى، نعمل الكمونية،
ودي سهلة أوي لأنها كلها ني في ني.

مافهمتش حاجة، بس حكاية سهلة أوي دي شجعتني،
فانسحبت من لساني وقلت لماما: طب خليني أنا اللي
أطبخها .

وبتلقائية وخوف طالع من القلب، لقيت الست الأميرة
الطيبة اللي بتساعد ماما في البيت، واللي أنا متأكدة إنها
بتحبنى زي بنتها بتقول:

- لأ، علشان خاطري بلاش تجربي فينا. باباكي بيحب
الأكلة دي، بلاش تزعليه!!

حفزني كلامها (الله يرحمها)، وقررت أدافع عن كرامتي
الي إتبعزقت علي أرض المطبخ، وصممت إني أنا اللي
حأعمل الكمونية.

- ياللا قولولي أعمل إيه؟

- أول حاجه، قطعي البصلة دي مكعبات صغيرة، وأدي
اللوخ الخشب وأدي السكينة، وخلي بالك على صوابك.
- توكلنا على الله، وأدي تقطيعه.

أنا يادوب أبتديت أقطع من هنا والدنيا زغللت من

هنا. وأنهار من الدموع سألت على وشي، ومابقتش شايفة لا البصلة ولا السكينة، وعنيه كانت بتحرقني زي الحرامي اللي رشوا في وشة ببر سبراي!!

في الظروف العادية، كنت طبعًا إعتزلت الطبخ وأنا في عز شبابي، ولكن عندًا في "أم فايضة"، قررت أكمل المشوار. بس إزاي حاستحمل تقطيع باقي البصلة؟؟ أيوه فكرة!!

- من فضلكم محدش يقرب من البصلة بتاعتي. حأروح أحيب حاجة من جوه وحأرجع على طول.
فتحت دولابي، ومن الدرج المخصص لأدوات السباحة، أخذت المطلوب ولبسته ورجعت المطبخ.

الظاهر إن ماما و "أم فايضة" ماكانوش متوقعين مني العبقرية الفذة دي في حل المشاكل، لإنهم بدل ما يشجعوني ويهنوني. وبعد خضتهم من المخلوق الفضائي اللي دخل عليهم ما عدت على خير. طلبوا مني أخلع نظارات الغوص، والنفس أبو كورة بينج بونج، والخروج من المطبخ بلا رجعة.
ولحد دلوقت لسة مادخلتوش.

والي عقدني أكثر إن في أقل من ٢٤ ساعة، كانت الحكاية دي إتعرفت في العيلة كلها، وكمان بين الأصدقاء والمعارف.
بس الحمد لله، والظاهر ان ماما كانت عايزة تتخلص مني بأي شكل، فمحتكش الموقف دا "لمنصور" إلا بعد ما إتبس وإتجوزني.

والي رسخ العقدة وخلاها غير قابلة للحل، إن بعد سنين، أختي

بقت شيف أَد الدنيا، وعندها برنامج تليفزيوني اسمه ”ولا في الأحلام“ .
 وفي يوم، كنت بتمشى معاها هي وابني في دبي، وكان إبني فخور بيها
 لإن الناس بتتعرف عليها، وبتيجي تسلم وتتصور معاها، فسألني:
 - ليه، ياماما، مابتعمليش برنامج طبخ علشان تشتهري زي
 أنطي نرمين؟
 - علشان أنا مابعرفش أطبخ. أكيد القناه مش حترضى
 تعملي برنامج زيها.
 - يمكن يوقفوا لو قتلهم حتسميه ”ولا في الكوايس“!!!



المساطيل

زمان، كان فيه تصرفات معينة بتعفرتني، وبتفقدي احترامني
للي بيرتكبها، ومش بأعرف أعذرهم لإني كنت زي القانون، لا
أحمي المغفلين.

من الحاجات دي الإهمال والدهولة.

صحيح أنا كنت دائماً بأنسى الواجب، لدرجة إني في
المدرسة، استحققت لقب نهول المسطول، بكل جدارة. لكن دا
نسيان مقبول ومحمود، لإن أصلاً، فكرة الواجبات، هي اللي
غلط .

لكن أنا فاكرة كويس، لما قرأت في الجريدة إن واحد
نسى شنطة فلوس في الترام، قلت عليه لامؤاخذة مغفل،
إزاي حد ينسى حاجة مهمة كدة؟؟

ومرة تانية، واحدة معرفة سابت طقم مجوهرات في
التاكسي. برضه قلت عليها مدهولة.

يظهر إن الراجل والست دول كانوا أولاد حلال، لأن بعد
سنين طويلة، ربنا خلص حقهم مني، ومش سيبت فلوس،
ولا مجوهرات، ولا ياقوت أحمدك يارب، في التاكسي. لأ، أنا
نسيت ابني البكري!! وهو طفل عنده ثلاث سنين!!

علشان أنا حقانية، وأحب أدي كل ذي حق حقه، لازم
أذكر إن "منصور" هو اللي لعب الدور الرئيسي في المشن
اموسيل دي!!

كنا راجعين من إجازة في اليونان، وبالتحديد من- أستغفر
الله - جزيرة ميكينوس.

”منصور“ كان كسر رجليه هناك. واضح إنه ماكنش مركز،
وبدل ما يبص قدامه، كان بيصبص قدامه، فوقع وحصل اللي
حصل .

المهم، وصلنا مطار الظهران، وبعد ما خلصنا إجراءات
الوصول، وتفتيش الشنط، كنا فعلاً تعبانين. و”علي وناهد“
كانوا أطفال ونيمانين، فبدل ما نطلب تاكسي الشركة اللي
متعودين ناخده، واللي بياخد على الأقل ربع ساعة علشان
يوصل من الظهران للمطار، قررنا إننا نركب تاكسي أصفر من
الي واقفين برّه المطار.

ولأنه مش تاكسي أرامكو، ”منصور“ كان قاعد جنب
السواق وبيشرحله إزاي يوصل للبيت، خاصة إن كامب السكن
في الظهران، كله بيوت شبه بعض، ومافيهوش أي معالم
مميزة.

أنا كنت في الكنبة ورا، وشايلة بنتي وهي نائمة على
دراعي، وابني راسه على حجري، ونايم جنبي.
وصلنا البيت، ولإني مش حأعرف أشيل ”علي“ و”ناهد“
مع بعض، ولإن رجليه في الجبس ومش حيقدر يشيل، قلت
”لمنصور“ :

- أنا حأطلع ”ناهد“، وبعدين حانزل آخذ ”علي“.

وطلعت، وبسبب الوسوسة المفرطة اللي كانت عندي

وقتها، ماقدرتش أحط "ناهد" في سريرها، إلا بعد ما غسلت
وبعدين نشفت أيديها ورجليها، وهي نائمة.

ونزلت علشان اخد "علي" زي ماقلت ، لقيت "منصور"
جوه البيت مع الشنط ، رحى غرفة التلفزيون اشيل "علي" ،
ما لقيتوش

- فين "علي" علشان أطلعاه فوق.

- لأ، حلوة

- لأ، بجد هو فين علشان أطلعاه، وادخل أنام لإني
فطسانة .

- بلاش هزار في الحاجات دي وحياتك.

- إنت اللي بلاش هزار!! هو فين؟

- إنت ما طلعتيهوش مع "ناهد"؟؟

- أنا مش قلتلك حأطلع "ناهد" وأنزل أخده؟؟

عرفت من نظرة الرعب اللي ظهرت على وش "منصور"
إن الموضوع ما فيهوش هزار، وإنه حاسب التاكسي ومشاه،
وومخدش باله إن "علي" نايم في الكنبه اللي ورا!!

للحظة دي محفورة في ذاكرتي، وتستحق بجدارة المركز
الأول، في أسوأ لحظات حياتي.

وعلشان تكمل، عربيتنا كانت فيها مشكلة قبل ما نساfer،
ف"منصور" باعها، وقرر يشتري واحدة تانية لما نرجع، يعني
مش حنعرف نسوق للبوابه ونلحق التاكسي.

بالنسبالي، الزمن توقف!! وتفكيرى كمان اتشل!!

واضح إن ”منصور“ كمان حصله نفس الشيء، لإنه وبدل ما يعمل التصرف المنطقي بالاتصال بالبوابة، علشان يوقفوا التاكسي، طلع برة البيت، وابتدى يجري في الشارع، برجله المكسورة لحد ما اختفى.

وقفت في الساحة الي بيتنا فيها وأنا في حالة ذهول، والشوارع فاضية تماما، ومافيش أي حس لإن الساعة كانت الثالثة صباحًا، والدنيا ضلمة إلا من نور خافت من أنوار الشارع. ولمدة أطول وأسوأ سبع دقائق في حياتي، كانت أبشع سيناريوهات الرعب، عمالة تشتغل في راسي، عن مصير ابني.

مش عارفة إزاي الدقائق دي عدت عليا، بس فجأة شفت نور كشافات عربية، في الشارع الموصل للساحة، رد لي الأمل، ولما شفت اللون الأصفر للتاكسي، روحي رجعتلي.

التاكسي وقف أمامي، ونزل ”منصور“ وهو شايل ”علي“، والسواق عمال يقول:

- الزبائن بتنسى في السيارة أشياء كتير، بس أول مرة حد ينسى ابنه، ماجصرتوا!!!

- إحنا شاكرين لك جدًا جدًا، يا ”بو حسين“، ربنا يكرمك على إنك رديت لنا ”علي“.

- وكمان اسمه ”علي“!!! في حد في الدنيا ينسى ”علي“؟؟ لا حول ولا قوة إلا بالله.

مش عارفة إزاي ”منصور“ كان لسه فيه نفس يهزر:

- يعني هو لو كْنَا نسينا بنتي ”ناهد“، كان عادي؟
- مش الجصد، بس اسم ”علي“ دا كله بركة!!
- ماكنتش مركزة معاهم في الحوار دا، أنا بس كنت عمالة أبوس ”علي“، ومش مصدقة إن ابني رجعلي.
- والحقيقة إن لما ”منصور“ حاول يدي السواق مبلغ من المال، الراجل رفض، وفضل يقول، بس الله يكرمكم حافظوا عليه.
- بعد ما غسلت أيديه ورجليه ونشفتهم، حطيته في سريره، وانا بأحمد وأشكر ربنا.
- لقيته إزاي؟؟
- هو اللي لقاني، أنا جريت لحد أول الشارع، ومالقيتش أي عربية، وبعدين حسّيت بوجع رهيب في رجلي، فقعدت على الرصيف، وقَعَدت ادعي ربنا يردلنا ”علي“، وبعدين شفت نور عربية بتدخل وتخرج من الساحات المجاورة، كإن حد تايه. وقفت في نص الشارع، وقَعَدت أشاورله، لحد ما شافني، والحمد لله طلع هو.
- يعني هو اللي رجع لوحده؟
- أيوه، بيقول إنه وقع في مطب، فالظاهر إن ”علي“ أتحرك أو عمل صوت، فالراجل إتخض وافكره عفريت.
- وبعدين؟
- بيقول من ساعتها بيلف في الكامب بيحاول يلاقي البيت لحد ما شفته.
- الحمد لله، الحمد لله.

- ياساتر!! أهو دا أسوأ كابوس شفته في حياتي.
 - الحمد لله إن ربنا عداه على خير، وياريت نحاول ننساه
 لإني مش حأستحمل أفكره ثاني.
 الساعة الخامسة صباحًا، يدق جرس الباب.

- إيه دا؟ مين بيخبط دلوقت؟
 - مش "علي" و"ناهد" في غرفتهم؟
 - أيوه.
 - خلاص مش فاتح.
 يدق جرس الباب ثاني.
 - لأ، دا حد غلس بقى.
 يفتح "منصور" الباب، ويلاقي سواق التاكسي.
 - أهلاً "بابو حسين"، خير؟
 - آسف إني صحيتك، بس مانسيتوش حاجة ثانية؟
 - لأ، "علي وناهد" نايمين فوق، لو لقيت أطفال تانيين
 في السيارة، يبقوا مش تبعنا.
 - طيب شيك على الشنط.
 - واحد، اتنين، ثلاثة، أربعة. لأ، كله تمام، "بابو حسين".
 - طيب ماكنش معاكم كاميرا سينما.
 - أيوه، أيوه!! نسيناها معاك؟

- أنا وصلت زبائن بعدكم، ولما نزلت الكاميرا مع شنطهم، قالوا إنها مش بتاعتهم، فقلت لازم تبع "أبوعي"، أصل اللي ينسى "علي"، ممكن ينسى أي حاجة!!
- شكرًا، "يابحسين"، كتر ألف خيرك.

وتمر سنة، ونرجع بعد إجازة في اليونان عند بابا، بس المرة دي ، كنا إتعلمنا الدرس، ف"منصور" طلب تاكسي أرامكو ليًا أنا والأولاد، وهو فضل في المطار منتظر دوره في تفتيش الشنط، اللي كان بياخذ وقت طويل.

روحت بسلام، ونيمت الأولاد بعد ما حميتهم وهم نايمين، وقَعَدت منتظرة "منصور". وفعلاً وصل بعد فترة ومعاه الشنط، ولما دخل قالي:

- فين "علي"؟

- نايِم في سريره.

- طيب ممكن تنزليه؟

- ليه؟ دا في عز النوم.

- لإني لما خلصت، كسلت استنى تاكسي أرامكو، فأخذت تاكسي أصفر، بس لقيته بيوصلني عالييت من غير ما أديله العنوان. طلع "أبوحسين"!!
- لأ، مش معقول.

- والله، والراجل مصمم يشوف "علي"، علشان يتأكد إننا ما ضيعنهوش أو نسيناه في حنة!!

طبَّعًا كل محاولاتي إني أنسى الحادثة دي بامت بالفشل،
لإن ولسبب مجهول ليًا، ”منصور“ كان فخور جدًّا بالحكاية دي
ويحكيها لكل وأي حد نقابله.

وبرضة لسبب ما، الحادثة دي كانت الحكاية المفضلة
لابني ”علي“، فكان كل سنة يحكيها لفصله في المدرسة، في
فقرة الـ Show & Tell

وطبَّعًا، كُنَّا كل ما نروح نقابل مدرسة الفصل في اجتماع
الآباء، كانت المدرسة بتزغرلنا بنظرات مريبة، وبعدين تسألنا
عن حكاية ”علي“ والتاكسي!!

وأعتقد إن من كتر ما ”منصور“ و”علي“ ماحكوا القصة
المأساوية دي، قدروا يتغلبوا على التروما بتاعة الموقف.

أما أنا ، فحقيقي كنت بأحاول أمحي الموقف دا من
ذاكرتي، وعمري ما حكتهما لحد، على أمل إني أنساها، لكن
للأسف مش بنساها، وعندي عقدة نفسية مكلكعة منها.

وبناء عليه، قررت إني أحكيلكم، على أمل إني أتعايش
مع الموقف، ودقات قلبي تبطل تعمل كونسيرتو، كل ما
أفتكره.

أما رأيي في الأشخاص الي بينسوا حاجات مهمة، فأكيد
معذورين، جل من لا يسهو.

الزوجة العاقلة

المعدن الأصيل يظهر في الشدائد، والشدائد في الحياة الزوجية لها وجوه كثيرة، معروفة ومحفوظة، فمش خحوض فيها. لكن حأذكر موقف تعرضت له، وبالرغم من شدته وغبابته، قدرت استحمله، والسفينة كملت الرحلة.

من حوالي عشر سنين، زوجي العزيز جتله حصوة في الكلى، وكانت أول مرة أشوف دموع الأم في عينيه- مع العلم أن له قدرة لاتصدق على احتمال الأم. الأم كان شديد لدرجة إن وجهه اكتسى باللون الأرجواني الغامق، وعضلاته إتعصرت بقسوة بطرق لم أكن أعرفها ممكنة. أم مقدرش حتى أدعي بيه على شخصيات مجرمة وكريهة، ولا أقولكم، فيه كام واحد في بالي، مش خسارة فيهم الأم دا. ماتخافوش، كلهم شخصيات عامة.

نرجع للحصوة، بعد ساعات من العذاب، أخيراً وافق يروح الطوارئ، فعملوا اللازم، وقالوا يفضل تحت الملاحظة لتاني يوم، وأنا طبعاً جنبه، أراعيه، وأدعيه، وأطمئن من الدكاترة عليه.

بس مش دي الشدة الي تعرضت لها، لسه.

بعد فترة، وخصوصاً بعد كل المحاليل الي أخذها، زوجي العزيز طلب مني أنادي الممرض، علشان يساعده في الذهاب للحمام، خاصة إن جهاز الحقن الوريدي كان لسه

متوصل بذراعه. لكن أنا رفضت وصممت أوصله بنفسي. ما شاء الله، ربنا يحميني لشبابي.

ساعدته على النزول من السرير، وأخذته إلى أقرب تواليت، أظن لحد كده عداني العيب، ولكن الي حصل بعد كده هو سبب الخلاف.

أعتقد، أنه كان متوقع مني أن أفتح له الباب، ولكن لسوء حظه، مكنش معايا مناديل ورقية أمسك بيها مقبض الباب. وكل ما أحاول أغضب على نفسي إني أمسكها، أفكر إن دي مش بس دورة مياه عامة، لأ وكمان رجالي، وكمان في مستشفى. يعني الميكروبات الي عليها من كل شكل ونوع، فلا يمكن، أكرر لا يمكن، حألمس المقبض الموبوء.

وأنا واقفة مبلمة قدام الباب كنت باسمع صوتين، صوت عاقل يهمس في أذني الشمال: «هو الي مفروض يمسك المقبض، وبمجرد ما يدخل يبقى يغسل إيديه بالماء والصابون. صحيح هو ماسك الحامل بإيد، وماسك جاون المستشفى من ورا باليد الثانية، ولكن دا مش عذر».

وكان في صوت متهور بيهمس في أذني اليمين: «يا بنتي، حرام عليكي، بلاش الوسوسة بتاعتك في المواقف الصعبة دي. افتحي له الباب، ولما تروحي، ابقِي استحمي بزجاجة ديتول».

يقوم الصوت الأول يرد ويقول: «سيبك منه، زوجك العزيز مش حيقدر ينتظر كثير، اصبري».

وأنا محتارة بين الصوتين!! فضلنا كدة كثير؟ أيوه، حوالي ٧ دقائق، لا أنا قادرة أتغلب على خوفي من الميكروبات، ولا زوجي العزيز عايز يخلصني من الإحراج ده، ومستني يشوف آخرتها مع الست الكُمل أم ولاده.

وأخيرًا، ربنا بعتلنا ممرض ابن حلال مصفّي، كان باين عليه الدهول من الموقف الغريب اللي قدامه. أكيد قال علينا مش طبيعيين، أو أغبية جدًا لإننا مش عارفين نفتح باب الحمام. فكثر خيره، قرر يساعدنا، وفتح الباب لزوجي العزيز، وأنقذ الجوازة.

مع خالص تمنياتي بالصحة والعافية لكل البشر، وخاصة العباقره اللي إخترعوا الديثول، والمناديل المبللة، والچل المضاد للبكتيريا.



الحكيم في الجمرك

منذ أكثر من عشرين سنة، كنت أعيش وأعمل في الظهران بالسعودية. ولإن المدينة أسسها الأمريكيان، فاللغة الرسمية في العمل وخارجه كانت الإنجليزي؛ حتى المكتبة الهائلة بالمدينة، لم يكن بها إلا كتب إنجليزي.

وحشتني الكتب العربي، فقررت إني في أول أجازة حشترتي كتب من مصر، وأخذها معايا للظهران. زي ما حنشوف، من عشرين سنة؛ دي كانت فكرة مبيّلة بنيلة. نزلت من الطائرة، وخلصت إجراءات الوصول، واستلمت الشنط. وبقلب جامد رحيت على مكان التفتيش، المفتش فتح الشنطة من هنا، وعنيكوا ماتشوف إلا النور من هنا!! شرار طلع من عينه وأصوات غريبة طلعت من بقه!!

كان معايا حوالي أربعين كتاب، بس ردة فعل المفتش شككتني في نفسي. وخفت ليكون حد دسلي مشروبات كحولية أو أفلام بورنو، لكن الحمد لله، الشنطة كان مافيهاش غير الكتب بتاعتى!!

واعتماداً على اطلاعه الواسع، قرر المفتش إنه حيفرز الكتب المسموح بها من الممنوعة بناءً على عنوانها.

صحيح عندنا مثل بيقول الكتاب بيان من عنوانه، بس عمري ما كنت أتصور إني حاشوف التطبيق العملي للمثل ده. وكمان المثل في الإنجليزية بيقول عكس كدة، فكنت متشوقة

أعرف مين فيهم اللي صح. نتدي الفرز.

*عصفور من الشرق: كتب الطيور مافيهها مشاكل. نسوي مجموعة على اليمين.

*يوميات نائب في الأرياف: مسموح

*براكسا ومشكلة الحكم: هادا غير مسموح: ممنوع كتب السياسة. نسوي مجموعة على اليسار
*ليلة الزفاف: ممنوع. مو محتاج شرح ليش.

*شهرزاد: ممنوع... لإن شهرزاد هادي كل قصصها مرة خليعة .

*أهل الكهف: قصة من القرآن؟ ماشاء الله. أكيد مسموح.

*الأيدي الناعمة: ماهو هين هالحكيم. حيرني معاه. طب نسوي مجموعة ثلاثة هنا في الوسط.

لحد هنا وكنت مجرد ندمانة على جلب هذا العدد الكبير من الكتب... والي كلها لتوفيق الحكيم لإني كنت معجبة جدًا بكتاباتة. وإعجابي زاد لما عرفت إنه يقربلنا من بعيد، بعيد أوي. وكنت بأصبر نفسي وبأبرطم بصوت واطي: اللهم طولك ياروح.

*عصا الحكيم: مافيش مشاكل.

*حمار الحكيم: وكتب الحيوانات، مافيهها مشكلة.

*حماري وحزب النساء: إيش فيه هالحكيم؟ وهو حكيم

إيش بالضبط؟ بيطري ولا نسا؟؟

- لا لا... دا مش حكيم بمعنى طيب!! هو اسمه كده. دا

كاتب مشهور عندنا في مصر.

وطبعًا ماجبتش سيرة القرابة من قريب أو بعيد. وبرطمتي

تحولت لدعاء: ربنا يعدي اليوم المهيب ده على خير.

هنا كان شكل المفتش ابتدى يزهب؛ خصوصًا إنه إكتشف

إن الكتب مافيهاش صور. نكمل

* عودة الروح: دة شيء بيد الله وحده. ممنوع.

* هي والراهب: أستغفر الله. غير مسموح.

* عهد الشيطان: هادا كمان كافر ولا إيش؟ غير مسموح.

* الملك أوديبي: وكمان مش عارف إسم الملك!!

ممنوع .

* مصير صرصار!! إيش الجرف؟؟ إيش بيه هالحكيم

الخرفان؟ حمير وصراصير!... والله لولجيت كتاب فيه حمير

أو حشرات أو حريم أو سلاطين... لأكون مصادرههم كلهم.

وعلى حظي الطين - على وزن سلاطين - تفتكروا إيه

الكتاب الي طلعله وهو متنزفز كده؟

* أرني الله: أستغفر الله!!!! مش جلتك، هالحكيم كافر!!!

ومن غير ما أعيد الي قاله عن قريبي، أخذتها من قاصرها ووليت

الكتب كلها وأعطيتها للمفتش بنفسي، وقلت:
خليهم كلهم عندكم، وبكرة- إن شاء الله- جوزي يمر عليك ياخذ
الكتب الي حتوافقوا عليها. حيّاك الله.



الشغل

رحلتي مع العمل، كانت من أكثر التجارب الي أكدت لي إن الحياة أولويات، واختيارات، وكفاح. الأولويات ممكن تختلف باختلاف الزمان والمكان والظروف، لكنها كانت، دائماً وأبداً، البوصلة الي بتحدد لي خطواتي .

وبما أن الأولاد كانوا على قمة أولوياتي، وبالرغم من إغراء المركز والراتب، رفضت وظيفة مهندسة الكمبيوتر الي إتعرضت عليا. وقضيت أول ثمان سنوات بعد التخرج، في البيت، وطبعاً، عمل زوجي وراتبه، هم الي سمحولي بالخيار .

بعد حوالي تسع سنوات من تأجيل حلمي بالعمل، ولما بمساعدة صديق، إتعرض عليا وظيفة في مجالي، ولكن في مركز ومهترتب أقل مما تؤهلني له شهادتي، قبلت، اعترافاً مني باحتياجي للحاق بركب التكنولوجيا الي فاتني.

ظروف الشغل كانت مش سهلة، شركة أمريكية. نص الموظفين أمريكيان، ونصهم سعوديون؛ وأنا المهندسة الوحيدة، والست الوحيدة، بخلاف ثلاث سكرتيرات.

مع مرور الوقت؛ وبالجدية في العمل؛ وبالجدية في التعامل؛ علاقتي بأغلب زملائي أصبحت جيدة جداً والحمد لله. أما القلة المهندسة الي بتستظرف علشان أنا ست، أو الي

مش بيعاملني بالاحترام اللي استحقه، لأسباب عنصرية أو دينية (ست مسلمة ومش مغطية شعري)، فدل... إخترت إني أستعمل معاهم سياسة طاقة الإخفاء، بتخيل إنهم لابسينها، وبتصرف على أساس إنهم مش موجودين.

كمان كنت بفرح جدًّا، كل ما أفكر إن فيه موظفة جديدة انضمت لنا. يعني، أخيراً، سيكون لي صداقات وحياة اجتماعية في العمل. لكن للأسف باكتشف بعدها، إن أم علي، اللي زميل سعودي بينده عليها، دي تطلع أنا!!

وفضلت سنين على الحال دا، لحد ما إنضمت لنا إيناس، الزميلة والصديقة السعودية اللي بدورها كانت بتحطم قوالب مجتمعها بكل نجاح.

وتارة بالعمل الجاد؛ وتارة بالمطالبة بما أراه حقًا مستحقًا؛ وتارة بالخناق؛ وتارة بالصدق السعيدة... و"تارا عادل". نجحت في الحصول على كثير من الحقوق والدرجات الوظيفية التي أدعي إني أستحقها.

كما فشلت في كثير من المعارك، ولكني تعلمت، إني لست دائماً على حق. وعلياً أحياناً أني أكتفي وأرضى بشرف المحاولة، لأن الحياة غير عادلة. إتعلمت كمان أهمية حسن اختيار معاركي.

ساعدني العمل في محاولاتي لكسب الكثير من الصفات التي أفتقدها، كالتغلب على الخجل، والثقة بالنفس، والقدرة على التحدث أمام جمع كبير، وعدم التعامل مع الخلافات من منطلق شخصي.

هذا بالطبع بخلاف الجانب المادي، حيث منحني العمل الاستقلال المالي، وسمح لي بمشاركة زوجي، في حمل أعباء الأسرة المالية.

أما الكفاح، وهذا ينطبق على كل السيدات العاملات، فهو المحاولات اليومية للتوفيق بين العمل الوظيفي وإدارة المنزل- من أكل وشرب وتنظيف وغسيل ومساعدة في المذاكرة وتوصيل لتدريبات الرياضة وعدم التقصير مع أي من أفراد الأسرة. وفوق كل هذا، محاولة إيجاد ساعات قليلة لنفسي، تمكنني من المداومة.

والآن وبعد اعتزال العمل، أتذكر هذه السنوات، بحلوها ومرها، بكل فخر.



المشهد

بالرغم من تقديري الشديد للفنان المتعدد المواهب "أنور وجدي"، إلا إن تمثيله كان يتصف بكثير من المبالغة، وهو شيء كان مقبولاً في زمن هذا الفنان الجميل. لكن أكيد لو حد عمل نفس المشهد الآن، بعد عرض الفيلم بخمس عقود، كنا حنقول عليه مأفور أوي.

مين منا مش فاكراه، في فيلم حبيب الروح، والسبب "ليلي مراد" بتغني على المسرح، وهو قاعد في البلكون، ويدخل إيده في جيب الجاكتة، وحركة إيده وحواجبه وكل تعابير وشه تنبئ بإنه بيطلع مسدس، ويعمل بيه مصييه؛ وبعدين نتفاجئ ، إنه طلع منديل، ينشف بيه وشه!!

وبالرغم من إني حافظة المشهد، وشفته ميت مرة، إلا إني برضه إتخضيت لما نفس المشهد حصل لي في الحياة. كانت ماما بتزورني في الظهران، و"منصور" كان مسافر. ومش عارفة ليه قررت أخذ ماما ونروح الراشد مول في الخبر. بصراحة مش فاكراه إيه الحاجة المهمة اللي خلتنني أتهور وأعمل المشوار دا، بس هو النصيب.

حييت ألفت نظركم إن الأحداث دي كانت بعد شهر من انتهاء حرب الخليج في التسعينيات، فأصدقائي المطوعين كانوا شادين حيلهم في محاولة لاستعادة بعض من السيطرة اللي اتجمت وقت وجود قوات أمريكية؛ فيها جنود حريم، فتركروا وتفثق ذهنهم عن مجموعة من الفرمانات اللي هدفها

الأساسي - على وزن فرجاني ساسي - إنهم ينكدوا علينا؛
 وأقصد بعلينا، أي حد سعيد الحظ، يلاقهم في وشه.
 نرجع لحكايتنا، بعد ما أنا وماما خلصنا شوبنج، أخذتها
 ورحنا الفوود كورت علشان نأكل حاجة قبل ما نروح.
 قعدت ماما، وروحت أجيب قهوة وحاجة حلوة.

وأنا راجعة، شفت حديثين، مفهمتهمش.

هو كل حدث لوحده صعب، بس الإثنين سوا سوا،
 صعب أوي أوي.

نبتدي بالأخف وطأة، شفت ماما بتكلم شاب فلبيني، وهو
 بيقوم من على طرابيزته وبيروح ناحيتها، وببولعلها السيارة
 اللي في بقها!!

وفي نفس الوقت، شفت مطوع - كنا بنعرفهم لإنهم بيلبسوا غترة
 من غير عقال - وفي الوقت دا الحكومة كانت بتمشي معاهم إسكورت
 من البوليس، لتقليل المشاكل-فشفت المطوع والحاشية اللي حواليه متجهين
 ناحية ماما.

أنا كنت جنب السلم، لكن ماما ماھنتش عليا، فمهربتش،
 وكملت خطواتي المرتعشة نحوها.

وصلت ماما في نفس اللحظة اللي المطوع وصل فيها،
 وواضح إنه كان مصدوم من المشهد اللي أمامه، ففقد النطق
 لمدة دقائق، مروا كإنهم سنين.

في الدقائق دي، لمحت الشاب الفلبيني وكل الشباب اللي

معاه بيتسحبوا، وبينزلوا السلام جري.

وهنا، تكرر مشهد "أنور وجدي" في حبيب الروح. المطوع، حط إيده في صدره تحت التوب، بس بدل ما يطلع الكلابشات أو كرباج، أو أي حاجة منيئة من اللي جت في دماغه؛ الراجل طلع ورقة وقلم، وكتب كلمتين، وزق الورقة بقرف نحيتنا. وبعدين قال لنا كلمة واحدة: «كافر»، ثم دار، ومشى هو، والكتيبة اللي معاه.

لما الدم اللي كان هرب من عروقي ونزل على السلم مع الشباب القلبين قرر إنه يرجع تاني، أخذت نفس عميق، وقعدت جنب ماما، اللي أدهشتني برباطة جأشها، لأنها كانت قاعدة بتكمل سيجارتها عادي، ولا كإننا كنا على شفا التخشبية. فإكتشفت إنها مكنتش عارفة كينونة الزائر، ولا الأذية اللي كان ممكن يسببها لنا.

هي كانت ماسكة الورقة اللي سابها، وبتقوللي دا إعلان عن إيه؟

الورقة طلعت لسته بالفرامانات اللي طلعوها، واللي، بما إني مش غاوية شوبنج، ومش بروح المول إلا كل كام شهر، فمعدنيش أي فكرة عنها.

من الفرمانات اللي أنا لسه فاكرها:

ممنوع الاختلاط بين الرجال والحريم في أي منطقة

بالمول

ممنوع جلوس الحريم في الفوود كورت

يجب على جميع الحريم ارتداء العباءة السوداء

يحظر ظهور أي جزء من شعر الحريم

طبّعاً أنا بس حبيت أديكو فكرة عن كمية الموبقات - دا
من وجهة نظر المطوع - اللي أنا وماما ارتكبتها في اليوم
المهيب ده، واللي مكنش فيها، ممنوع على الحريم شرب
السجائر، لأنها أكيد مخطرتش على بال أي مطوع. فالمطوع
صاحبنا الغلبان إضطر يكتبها بنفسه في الورقة.
وعدى اليوم على خير، وعمري ما أخذت ماما المول
تاني .

ملحوظات:

كافر اللي المطوع قالها لنا طلعت «cover» «علشان
مكناش مغطيين شعرنا
فرجاني ساسي دا لاعب تونسي حريف أوي بيلعب
حاليًا في الزمالك



التخصصات الدقيقة

أثناء إحدى زيارات ماما وبابا لنا في الظهران، كنت قاعدة في مكثبي في الشغل، لقيت التليفون ضرب، وماما على الخط ومنزعجة جداً.

- خير، ياماما، مالك؟

- لأ مافيش، ماتتخضيش. بس الظاهر إن لما الأولاد كانوا في البيت وقت الغداء، سابوا الباب مفتوح لفترة، لإني وأنا قاعدة أتفرج على التليفزيون بعد ما نزلوا، لقيت برص ماشي على الحيطه، وإنت عارفة قد إيه أنا بأخاف منهم.

- عارفة ياماما.

- طيب أعمل إيه؟ خصوصاً إن بابا نايم جوّه، وإنتي عارفة إن صدره بيتعب من ريحة مبيد الحشرات.

- لأ، من فضلك ما تبخيش منه ياماما، لأنه حيتعب بابا، و"منصور" كمان.

- طب والعمل؟

- ماتقلقيش، إقفلني غرفة التليفزيون، وأنا حأتصل بإدارة مكافحة الحشرات والقوارض، وحيجولك يمسكوه على طول.

- أكيد حيبجوا بسرعة؟؟

- إن شاء الله ياماما. أنا حأقفل دلوقت علشان أكلهم.

- باي.

- باي.

حاولت أتصل بيهم زي ما وعدت ماما بس الرقم كان مشغول .

- ألو أيوه ياماما، معرفتش أكلهم، كانوا مشغولين، وأنا دلوقت عندي الاجتماع الأسبوعي للقسم، فحأديكي الرقم. إتصلي بيهم وقوللهم إن عندنا برص جوّه البيت، وإديهم الإسم والعنوان ورقم الشارة، وهم حيبعتولك المختصين.

- مش حيطلبوا حاجة تانية.

- لأ، بس حتكلمهم إنجليزي.

- طيب حأقفل علشان أكلهم.

بعد انتهاء الاجتماع، كلمت ماما علشان أطمئن.

- أيوه ياماما، إيه الأخبار؟

- نهلة إنت فين حيببتي؟ عمالة أكلمك مش بتري.

- لسة مخلصه الاجتماع والله، إيه الأخبار؟ جالك بتوع

البيت كنترول؟

- لأ، لسه، قالوا حيجوا الساعة ٢. يعني فاضل ربع ساعة،

تقدري تيجي البيت علشان أنا مش بأعرف أتفاهم معاهم.

- حاضر، هستأذن وأجي.

في المنزل وفي تمام الثانية، وصل عاملين من شرق

آسيا .

- أهم وصلوا.

- Good afternoon mam. Pest control

- Please come in. Yes in here

- بِسْمِ اللّٰهِ الرَّحْمٰنِ الرَّحِیْمِ ، هَم لِيَه لَابَسِیْن مَلَابَس رَوَاد
الْفَضَاء دِي؟

- هَمَا كَدَة، بِيخْدُوا الْمَوْضُوع جَد أُوِي. نِظَام امْرِيْكَانِي
بَقِي. وَشَفْتِي الْجَوَانْتِيَات الِي لَابَسِيْنهَا، دِي فِيْهَا لَازِق،
حِيْمَسْكَوَا بِيَه الْبِرْص، أَهْم شَافُوَه، دَلُوْقْت يَمْسُكُوَه عَلٰی طَوْل
و يَمِشُوَا .

بِس بَدَل مَا يَعْملُوَا الِي أَنَا أَتَوَقَّعْتَه، بَصُوا لِبَعْض وَخِيْبَة
الْأَمَل وَاضِحَة عَلِيْهِمْ. وَزِي مَا دَخَلُوا زِي مَا طَلَعُوا مِنْ الْغُرْفَة.

- Excuse me mam, big problem please cancel ticket and make a new request.

- What problem? I don't understand

- You have a gecko!

- I know. That's why I called

- Ticket is for Lizard. So I go

- I don't get it! Do you mean the problem is that my mom reported a lizard and not a gecko?

-Yes mam

- دا بِيْتَكَلَم جَد وَلَا بِيَهْزَر؟ زَعْلَان عَلْشَان أَنَا بَلِغْت عَنْ سَحْلِيَة وَمَا

جَم طَلَعْت بَرِص؟؟

- الظاهر كدة.

- علشان كدة كنت عايزاكي إنت اللي تكلميهم. أنا مش
واحدة على النظام الغريب بتاعكوا دا.
- ثانية واحدة لما نشوف آخرتها.

- OK, can you tell me how to fix this terrible
mistake? Should I get you a pen to change it in
the request?

- No no mam, I go & you make new request
for gecko

- Ok I promise I will, but can you just catch it
n o w

- No mam, no can do

- Why not? Lizard, Gecko, same same

- No mam. Big problem. Boss see dead
gecko not dead lizard

- Then don't show it to him! Catch gecko
and then throw it away anywhere

- No mam, boss must see

- يا مثبت العقل والدين، يارب.

- Ok friend. catch the gecko in my living room, and throw it
away. Then catch any lizard from the back yard and show that to

your boss.

- No no mam! Me only catch lizard. One more friend at office, he only catch gecko.
- Seriously?????
- Yes mam. Good day
- Good day friend. Thank you

- إيه دا ؟ مشوا؟

- أيوه، قال البرص مش تخصصه. هو تخصص سحالي.

- بجد؟

- آه والله.

- لأ، دانتو النظام عندكو صعب أوي، أنا مش واخدة على الجنان دا.

- معلش، حأكلمهم على طول.

بعد المكاملة.

- شكلك زعلانة، ماتخافيش، إخصائي البرص جي حالاً.

- لأ، مش زعلانة علشان كدة.

- لازم زعلانة من التعقيدات، هو النظام مايزعلش، لكن

أنا موافقاي إن المبالغة فيه مزعجة شوية.

- مش دا برضه اللي مزعلني.

- طيب غلب حماري.

- أنا بس زعلانة لإني كان نفسي ”منصور“ يقيسلي الضغط.
- بس كدة، حاضر أول ما يبجي من الشغل يقيسهولك إن شاء الله.
- لأ، من فضلك بلاش أحسن، لأنه ييشغل في الشركة
أم نظام عجيب دي، فخايفة يقولي: آسف يامدام، دا مش
تخصصي. من فضلك ألغي الجوازة، وجوّزي بنتك لدكتور
باطني!!!



أو مان!

بانتهاء زيارتي الثانية لسلطنة عُمان، قررت تغيير اسم السلطنة من عُمان الـ ” او مان!“، إنكلودنج علامة التعجب. أو مان! استحقت الاسم الجديد لعدة أسباب منها، الطبيعة المتنوعة والخلابة، اللي محتاجة شاعر مفوه علشان يوفيها حقها، نظافتها الملفتة، جمال منازلها المطيية باللون الأبيض، والأهم من كل دا، أهلها.

في مناسبتين مختلفتين، سألنا أومانيين! إزاي نوصل لغايتنا، وبدل من الماركة المسجلة، يمين في شمال، اللي بتتوصف لأي مكان في مصر، الأومانيين وصفولنا الطريق الصحيح بكل وضوح وأدب!

لسه مش منبهرين؟ طيب إيه رأيكم أن واحد من الأشخاص اللي سألناهم، كان ماشي في الاتجاه العكسي لطريقنا، بس لما عربية جت وراه، قبل ما يخلص شرح، طلب منا نستنى على جنب الطريق، ولفّ من أقرب يو ترن، وركن ورائنا، ونزل من العربية وجه وقف جنبنا، علشان يتأكد إننا فهمنا السكة. لسة مافيش أي انبهار؟ طيب للعلم الطريق اللي كُنا عليه كان ضيق وعلى جبل، يعني الدوران عليه صعب وأحياناً خطير كمان.

ممکن ناس تقول إن اللي بأحكيه دا مبالغ فيه ومش واقعي، وإنه حتى لو حد عمل كده، فدا سبب للقلق مش

الانبهار، وإن اللي يعمل كده أكيد كان عنده غرض آخر، غير مساعدة اتنين أغراب تايهين في الجبل.

إيه رأيكم إني موافقة على الكلام دا، وكان ممكن يكون عندي نفس الشك، خصوصًا إني جبانة وشكّاقة، وبأخاف من خيالي، بس أنا كان عندي ثقة كاملة في الشاب الأوماني! اللي ساعدنا من بعد الموقف الغريب اللي حصل في زيارتنا السابقة.

كنا في مسقط، وقرنا نزور فندق قصر البستان الشهر، فسألنا مكتب الخدمات بالفندق اللي إحنا فيه عن الطريق، فوصفوهولنا، وركبنا السيارة المؤجرة، وانطلقنا.

عند أول مفترق طرق واللي يبعد بالكثير ٢٠ مترًا من الفندق، كُنا والحمد لله، تهنا.

- أدخل يمينا ولا شمال.

- مش عارفة. انا ماركتش معاكم لأنك أنت اللي حتسوق.

- بالضبط. أنا اللي بأسوق، يبقى أنت اللي تركزي في

الاتجاهات.

- طيب مش كنت تقولي كده، وإحنا قدام الراجل.

حأرحمكم من تفاصيل الخناقة الزوجية دي، لإن دا خارج موضوعنا، المهم إن ولا أنا ولا زوجي العزيز حبيننا نكسر الحلفانات المغلظة اللي حالفناها، ف ولا أنا ولا هو رجعنا الهوتيل نسأل عن الاتجاهات.

وعلشان الخروجة ماتقلبش غم، ركن زوجي السيارة، ونزل يسأل مجموعة شباب بيلعبوا كورة في ملعب قريب. وبدل ما يرجع بإرشادات الطريق، رجع ومعاه الونج لفت، لإن زوجي العزيز طلب منه إنه يكرر وصف الاتجاهات ليا.

لثيم أوي زوجي العزيز دا. كده لو تُهنا، أبقى أنا السبب. الكابتن ونج لفت بدأ يشرحلي الاتجاهات، وفجأة بطل كلام وطلب مننا نتظره.

سمعت الكابتن بيكلم فريقه بلغة غريبة، وبعدين رجع مع لاعب آخر، وطلبوا مننا نمشي ورا سيارتهم، لإنهم حيوصلونا للبستان. ”منصور“ حاول يقنعهم يرجعوا الماتش، بس هم صمموا.

تبعناهم، جبال تشيلنا، ووديان تحطنا، وسط مناطق مأهولة، وأخرى مهجورة، بس ماكنتش قلقانة طول ما الدنيا نور وشايفه إحنا فين. لكن بعد الغروب بدقائق، الدنيا ضلمت، وابتديت أقلق، خصوصًا إن المشوار طول أكثر ماكنت متوقعة.

فهمت ساعتها معنى مقولة «بتخاف من خيالها»، لإن خيالي بدأ يخوفني ويقول، هي الجبال بقي شكلها مخيف كدا ليه في الضلمة؟ وعلى فكرة، إنتم حتى مش شايفين هم واخدينكم فين! في حد في الدنيا يسبب ماتش كورة، ويروح يوصل ناس مايعرفهمش؟ بقالكم سائقين أكثر من ٢٠ دقيقة!! فاكرة لما كلم أصحابه وأنتم ما فهمتوش؟ يمكن دول عصابة

ودا سيم بينهم، زي الأرازة في البزازة!! والسنجة في السرنجة.
شكلكوا إتخطفتم!!!

-منصور! لف وارجع من فضلك.

- أَلْفَ فين؟ هو أنا شايف حاجة؟ أنا ماشي ورا نور عربيتهم.

- شفت! يعني أخذونا في حطة مقطوعة!

- يابنتي اهدي وبلاش الرعب اللي إنت فيه دا.

- والله العظيم، لو اتخطفنا، عمري ماأكلمك تاني.

- يارب، يخطفونا.

حاولت أطمئن نفسي، بإني أفكر أي مناسبة، طلعت أنا غلطانة، وزوجي العزيز هو اللي صح، بس للأسف مالقيتش. تخيلوا راحتني النفسية، لما فجأة شفت أنوار، وأناكدت إننا رجعنا لمنطقة مأهولة، وظهر أمامنا فندق البستان، ولأول مرة في حياتي أفرح إن زوجي العزيز طلع رأيه هو اللي صح. دخلنا موقف السيارات، وبدل ما يشاوروا لنا ويمشوا زي ما اتمنيت، لإني كنت مكسوفة منهم - بالرغم من إنهم ماسمعوش سوء ظني بيهم. نزلوا يودعوننا، واعتذروا إنهم مش هيقدرنا يدخلوا الفندق معنا ويعزمونا على العشاء أو الشاي لإنهم لسه بملابس الكورة.

شكرناهم بشدة، وابتدينا نتجه للفندق، وزوجي العزيز سعيد جداً بانتصاره الوحيد عليا في حياتنا سوا، وبعدين سمعناهم ييجروا وانا ويندهونا.

شيطان الكبر جوايا تمنى إنهم يكونوا غيروا رأيهم وقرروا يخطفونا، بس للأسف طلعاوا عايزين يبلغونا إن لهم ابن عم بيشتغل في البستان، وإنه موجود جوه، وحيستقبلنا ويأخذنا في جولة في الفندق، وبعدين يقترح علينا أفضل مطعم لتناول العشاء والاستمتاع بأفضل عرض عندهم.

هنا بقى، فضلت أبص حواليا، لإني توقعت طاقم برنامج الكاميرا الخفية يطلعنا من ورا أي عربية ويسألونا، نذيع؟؟
لإن استحالة الذوق والأخلاق الراقية دي تكون حقيقة مش خيال.

والظاهر إنه صمم يعلمني درس في الأخلاق، لإن الونج لفت ، راح سيارته ورجع بكارته الشخصي، وطلب من "منصور" يتصل بيه بعد العشاء، علشان يبجي يرجعنا لفندقنا. ولما "منصور" قاله ان اللي عمله أكثر من كفاية، وإن جميله دا حيفضل دين في رقبتنا، الونج لفت قال إنه ماعملش حاجة تستحق الشكر، وإن الأومانيين! بيجبوا مصر، وبيجبوا المصريين جدًّا، وبيسعدهم وجودهم في أو مان!

أو مان!! ، أو مان!! ، أو مان!!

ملحوظات:

- الونج لفت طلع اسمه أنس.

- اللغة الي أنس كلم بيها أصدقاءه هي البلوشية.

- السهرة في البستان كانت روعة.

مخلوقات فضائية

كنت مسافرة مع جوزي وأولادنا إلى الولايات المتحدة. نزلنا من الطائرة، واتجهنا إلى مكاتب الجوازات المقسمة إلى قسمين: قسم تعلن يافطة مضيئة إنه مخصص لحاملي پاسپور الأمريكي؛ تخطيناه، وتوجهنا إلى القسم الثاني من غير ما ننتبه لليافطة المضيئة فوقه، لأنه أكيد - مش عايزة نباهة دي - القسم المخصص للأجانب.

الطابور كان طويل وممل، ويبدو إن ابني- الي كان عمره حوالي ثمان سنوات قرر إنه يقتل الوقت بقراءة اليافطة الي كانت أمامنا مباشرة.

انتبهت إن وجهه يبدو عليه الانزعاج، وإنه عمال بتلفت حواليه، وكأنه خايف من شيء مجهول.

- مالك، حبيبي؟

- ممممفيش!

- لأ، شكلك مش مبسوط. فيه إيه؟

- هو إحنا ليه واقفين في الطابور دا؟

- علشان دا الطابور بتاعنا. إحنا مش أمريكيان.

- عارف! بس دا برضه مش الطابور بتاع المصريين.

- لأ، دا طابور لكل الناس الي من بلاد تانية. يعني

.for all foreigners

- بس الياطرة بتقول غير كده.

قرأت اللوحة، واحتجت لثواني، قبل ما افهم سبب
انزعاج ابني، واجتاحتنى مشاعر عديدة؛
أولاً: شتمت الأمريكان - في سري - على قلة ذوقهم، لأنه
وبدلاً من اختيار تعبير مثل

Foreigners, Non-Americans, or Other Passports

زي كل مطارات العالم ما بتعمل، الأمريكان - بألاطهم المعهودة-
استعملوا كلمة Aliens.

ثانياً: ابني صعب علياً جداً، وفهمت سبب الرعب اللي
هو فيه، وإنه كان يتلفت حوله بحثاً عن المخلوقات الفضائية
اللي جاية تتفسح في أمريكا معانا.

ثالثاً: ودا المهم والصادم، إني بعد الإمعان في الكلمة، جالي شعور إني في
الحقيقة واقفة في الطابور الصحيح!!



عقدة الكلب

من الحاجات نادرة الحدوث واللي بقدرها جدًّا لما
بتحصل؛ إني ألاقي مجموعة من الأصدقاء؛ تكون آرائنا
وقيمنا متوافقة وأحياناً متطابقة لحد كبير.

علشان كدة لما التقيت بمجموعة بالصفات دي، سعدت
جدًّا، وكل ما أبص لهم أقول، ذهب مرجان ياقوت، أحمدك،
يارب.

فيه موضوع واحد فقط، كان كل ما يفتحوه، مأحطش
منطق. لإني مش بس بأجهله، لكن كمان بأخافه؛ موضوع
الكلاب .

كانوا بيتكلموا عنها بحب وغرام مابفهموش، ومش قادرة
أتخيله. وعلشان ماينش عليا الخوف والجهل، قررت إن كل
ما حد يقول كلب، أشيل كلمة كلب، وأحط مكانها حاجة
محببة إلى قلبي. يعني، مثلاً، باكو شوكولاتة.

بس دا برضة مش كفاية، وممكن يقع تحت بند النصب
على أصحابي، فقررت أتمرد علي رعبي، وأحاول أعرف
سببه؛ علشان أتخلص منه بلا رجعة. وبالرغم من عدم اتفاقي
مع معظم آراء سيجموند فرويد، قلت أجرب التحليل النفسي،
وأدور في عقلي غير الواعي عن سر العقدة دي.

فردت جسمي على الليزي بوي، وغمضت عينيه، وقعدت أدور على
أي كلاب في الماضي المجهول بتاعي؛ لحد ما لقيت نفسي بتفرج على المشهد

التالي:

نهار داخلي:

جرس الباب يرن. تتجه "أم فايضة" لفتح الباب.

- حاضر حاضر. أنا جاية أهو.

- صباح الخير، "يا أم فايضة".

- إزيك، يابني. كل دا تأخير؟ دا انا مستتية علبة الرابسو من الصبح.

- ولا تأخير ولا حاجة. عمومًا حقك عليًا.

- عايز كام؟

- ٦٤ قرش ونص، ومعايا باقي الجنيه أهوه.

- جنيه على شوية الحاجات دي؟ يامدام "أمال". البقال

جاب الطلبات وجايب باقي جنية.

وبها إن الدنيا كانت لسه أمان، تركت "أم فايضة" الباب

مفتوح ودخلت تشيل المشتروات.

في نفس اللحظة، تعود الجارة الإيطالية-والتي تسكن شقة

في الدور العلوي- من الخارج بعد أن انتهت من تمشيتها

اليومية مع كلبها. يجرها الكلب بقوة فتترك رباطه لعلمها أنه

سيصعد الدرج الي شقتهم كما تعود.

لسبب ما، وبعد صعوده طابقين، وبدلا من الصعود الي

الطابق الثالث، قرر الكلب الضخم- شبيهه روي في الشموع

السوداء- أن يدخل شقتنا عبر الباب المفتوح.

إيه دا؟ الشموع السوداء والباب المفتوح؟ انصرف، يا

”صالح سليم“!

كانت أختي اللي يا دوب عندها ثلاث سنين، هي أول من لاحظ وجود الكلب داخل الشقة، فإتجهت نحوه، وبدأت في اللعب معاه وكأنهم أصحاب من سنوات. قدر الكلب حسن الضيافة، واستسلم لها تمامًا.

تابعت لعبهم من بعيد لبعيد، والظاهر إني علشان سني أكبر- حوالي ٨ سنين- كنت حاسة إن الوحش اللي اختي بتلعب معاه دا، صعب يتصنف على إنه من الحيوانات الأليفة. لما اتطمنت إن الكلب مسالم، اقتربت منهم بضع خطوات. وفي الخلفية، شفت صبي البقال بيتابع اللي بيحصل بابتسامة، فإطمنت أكثر.

لو كان المشهد دا خلص هنا، أعتقد إن حياتي كانت حتختلف، والفوبيا اللي عندي ماكنتش حتكون موجودة. مع الأسف والألم، دا ماحصلش.

فجأة، المشهد اللي بيتعرض أمامي انقلب من حال إلى نقيضه، وكإن حد جاب الريموت كنترول، وقلب محطة التلفزيون من ديزني كيدز لمحطة أفلام رعب بتعرض فيلم سكريم .

تدخل ماما والنقود في يدها، وأول ما عينيها ما تقع على الكلب، تتسمر في مكانها، وتطلق صرخة مدوية!!!

تظهر ”أم فايضة“، ومن خضتها من الصراخ أو من رؤيتها للوحش- الله أعلم- تبتي صوت هي كمان.

ينزعج الكلب لأنه مش فاهم إيه اللي بيحصل، فيبتدي يهوهو بأعلى صوته.

وكان هوهوته دي مسدس الصوت اللي بيعلن انطلاق سباق الجري في أولمبياد الإسكندرية، لإنهم أول ما سمعوا نباحه،- ماما و"أم فايضة"- ابتدوا يجروا؛ محطمين رقم يوسين بولت الأولمبي في الـ١٠٠ متر عدو.

حتى صبي البقال اتخض، ونزل السلام جري من غير ما ياخذ فلوسه.

كان طبعي إني أجري ورا ماما حبيتي علشان تحميني من الخطر اللي ماكتتش لسه متأكدة منه. المشكلة إني لما وصلت غرفتها، لقيتها دخلت جوه وقفلت الباب وراها.
- افتحي، ياماما، بليز.

- (بصوت واحدة شافت عفريت) لأ، مش حأقدر أفتح دلوقت!! بس ما تخافيش، يانهولتي!!
- لأ، أنا خيفة.

- لأ، ماتخافيش، خليكي شجاعة، كلب "طنط سوزي"
ما بيعضش .

- طيب، مادام مايبعضش افتحيلي بقى.

- حأفتح بس بعد ماتخلي "أم فايضة" تطلع "طنط سوزي"، وتقولها تيجي تاخذ كلبها.
- بس أنا خيفة اطلع برّه.

- خليكي شجاعة علشان أختك ماتخفش.
- هي مش خايفة دي بتلعب معاه، افتحيلي بقى، يمامي.
- لأ، اندهوا "طنط سوزي" الأول!!
منك لله، يا "فرويد". أنا مش بس عرفت سبب العقدة؛
دانا كمان حأروح أسحب أوراق ترشيحي لأمي من مسابقة
الأم المتألية!!!



حكاية أغنية

والدتي فنانة ، بتحب الفن جدًّا، وحببنتي في كل فروعه،
من أغاني وموسيقى وأفلام وكتب ورسم وغيره.

كمان، عرفتني إن في شخصيات، لها مكانة خاصة في
حياتنا، زي الدكتور اللواء ”محمد عبد الوهاب“، الي لازم
نحط وردة فوق الراديو أو التلفزيون الي بيغني فيه، وإن فيه
فطاحل تانيين زي ”يوسف بك وهبي“، الست ”ليلى مراد“،
والقدير ”نجيب الريحاني“، والعبقري ”أنور وجدي“، وغيرهم.
علشان كده لما كل القامات دي تجتمع في فيلم واحد
”غزل البنات“ فأكيد سيكون دا فيلمها المفضل، واللي كل ما
بيتعرض، لازم نقعد نتفرج عليه معاها، مع بوكيه ورد كامل
فوق التلفزيون.

لأ، وكل مرة، لازم نطلع بدرس في التمثيل، أو الغناء، أو
الكوميديا، أو غيرها.

من أحب الحاجات لماما في الفيلم، الإعجاز في كلمات ”حسين السيد“
في أغنية الحب جميل؛ وخصوصًا آخر بيتين لما قال:

لما يخاصمني بأفرح وأصور.. فرحة لقاها لو يوم جاني

وإن جه صالحني أبكي وأفكر.. من خوفي ليخاصم تاني

هي معجبة جدًّا بالمعنى المبتكر، أنها بتفرح لما
يخاصمها، وبتبكي لما يبصالحها، باعتبار ما سيكون.

كان صعب عليًا وأنا صغيرة إني أستوعب وأقدر المعنى

دا، بس صدقت أمي وأكدتلها إني معجبة جدًا بالكلمات،
والحكاية عدت.

ولما ولادي كبروا، هم كمان كان إجباري يتفرجوا على
الفيلم معاها، صحيح العربي بتاعهم على قدهم، بس شكلهم
كانوا بيستمعوا بجد بالفيلم، أو بيستمعوا يكونوا جنبها وهي
في قمة السعادة.

بعد سنين، بنتي كانت في تورونتو في الجامعة، وكانت
ساكنة لوحدها بعد ما أخوها الكبير ماتخرج.

رحت أزورها، وقعدت معاها أسبوعين، اتبسّطت فيهم
جدًا. وجاء وقت السفر، وهي جت معايا توصلني لأتوبيس
المطار. أنا فضلت ماسكة نفسي ومش بأعيط، وبأصبر نفسي
وأقول، حأشوفها تاني بعد شهرين إن شاء الله، لما تخلص
الامتحانات .

لكن لما ركبت الباص، وبصيت عليها من الشباك، وهي
واقفة في البرد، وشكلها طفلة أصغر من سنّها، ما قدرتش
أمسك نفسي، وابتديت أبكي بحرقة.

شافتني من الشباك، والظاهر صعبت عليها، فطلعت
الباص، وجت حضنتني، وبعد ثوان قعدت جنبي وقالت:

- من فضلك بلاش تعيطي ماما.

رديت وأنا ببكي.

- حاضر حبييتي، بس غصب عني. زعلانة إني مسافرة،

وحسيبك هنا لوحداك في البرد دا.

- لآ، ماتزعليش، أنا فرحانة إنك مسافرة.

- فرحانة ؟ ليه كدا، يانونا؟

- "ميمي" علمتني كده، أنا بفرح لما تسافري وأزعل لما تيجي، زي "ليلي مراد".

- ألو أيوه ياماما. أيوه الحمد لله وصلت البيت، وناهد كويسة وبتبوسك. بس عندي طلب من فضلك، بلاش تعلمي أولادي أغاني "ليلي مراد" تاني.

- ليه إيه اللي حصل؟

- لا مافيش، بس ناهد لما لقيتني بغيط، سابت الشعر العربي كله، من الشعر الجاهلي والمعلقات، وحتى الشعر الحلمنتيشي، ومافكرتش غير أغنية "ليلي مراد" اللي حضرتك علمتها لها.

- بجد؟ حبيبتي، إيه اللي فكرها بأغنية "ليلي مراد"؟

- قسمتي ونصيبني!! ، قال إيه، حبت تخليني مأعيطش، علشان مسافرة وسايهاها، فغنتلي لما يخاصمني أفرح وأصور.

- بجد؟ وانت عملتي إيه؟

- حأعمل إيه، ضحكت طبعًا، فكل اللي في الباص اللي مش فاهمين اللي بيحصل، شكلهم خافوا مني، وافتكروني إرهابية. أصلي بأتكلم عربي، وبأضحك وأعيط في الوقت نفسه، وبعدين بأقولها لا إله إلا الله، حاجة تقلق!

- خلاص ولا يهملك، المرة الجاية، حأعلمها، ماما زمانها

جايه!!

- لأ، كده أنا اللي حأغنيك ”أخاصمك آه“!!!



السوبر هيرو

سافرت دبي أزور ابني وحفيدي.

في تاني يوم لي هناك، وفي وقت الظهيرة، رحمت مع حفيدي لغرفته، وقعدت معاه أقرأ له وأغني له قبل ما ينام، ولأن اللي يخاف من العفريت يطلع له، كل ما حفيدي يغمض ويروح في النوم، نسمع صوت عالي وغريب من ناحية البلكونة، يصحيه ويخضني.

ستائر الغرفة الثقيلة، واللي حاجبه شمس الظهيرة، منعنتني أعرف مصدر الصوت. فخيالي الواسع، والأجبن من الجبن، كان محتار بين اختيارين، حرامي غشيم أو سييدر مان. بعد ما الموضوع ما طول استجمعت شجاعتي، وبصيت بحذر من ورا الستارة، ويا هول مارأيت!!

مطلعش مجرم ولا سوبر هيرو، طلعت يمامة وقعت في البلكونة واتزنقت في ركنة ضيقة بين السور والزجاج. وكل ما تحاول تطير، جناحينها يخبطوا في الزجاج وتقع تاني، وبما إن أنا جبني مأسل، ويمتد لكل فوائل مملكة الحيوان، وأحيان كثيرة لمملكة النبي آدمين كمان، ناديت على ابني حبيبي علشان يتصرف.

الظاهر، والله أعلم، إن الجبن وراثة، لإن النظرة اللي إترسمت على وشه، لما شاف الطير، كانت بتقول كلام كثير، مش حقدراً أذكره علشان الرقابة.

المهم، ابني ساب الغرفة ورجع بعد دقائق، ومعاه مكنسة ومقشة!!

صحيح أنا برضه مهندسة زيه، بس أعترف إني فشلت في استنتاج التكنيك الي هو كان حيتبعه، علشان يخلص الطير من محنته، باستعمال أدوات التنظيف دي!!!!

واضح ان المحاولات باءت بالفشل، ومقدرش يقنع الطير بالنط على المكنسة أو المقشة، لإن بعد دقائق معدودة، ابني رجع داخل الغرفة، وقطرات العرق والإحباط تتبعه. اتجه إلى غرفة نومه، وفتح دولابه، وعاد لغرفه ابنه وفي إيده مضرب التنس!!!!

أفكر ابتديت أفهم النظرية العلمية ورا حلوله المبتكرة، لازم ولا بد يكون فيه على الأقل مسافة متر، بينه وبين الطائر!! صحيح، العرق يمد لسابع جد!!

اتجه ابني نحو البلكونة، وقال لي بكل شجاعة: امسكي الحاجات دي، وتعالى ورايا من فضلك ياماما، علشان تساعديني .

وفجأة، حصل ما لم نتوقعه أو نتمناه، مرات ابني دخلت الغرفة!!! للعلم، هي كندية، وتربت في منطقة بحيرات وطبيعة خلابة، فبتعشق الطبيعة والحيوانات، وكمان-على حظنا المهيب- واخدة ماجستير في دراسات المحافظة على البيئة!!!!

بس حبيت أقولكم المعلومة دي علشان تتخيلوا معايا نظرة الرعب الي اترسمت على وشها، لما شافت جوزها ماسك مضرب تنس، ووراه حماتها بالمكنسة والمقشة، وشكلنا

رايحين نفتح عكا!!!

- WHAT'S GOING ON????

دا هي اللي بتقول.

- Nothing! We're just trying to save this pigeon.

دا ابني اللي بيقول.

- Save it? It doesn't look that way to me!

دا هي اللي بتقول.

- يادي الكسوف

دا أنا اللي بقول في سري.

ممکن تتخيلوا منظرنا أنا وابني، وإحنا واقفين زي التلاميذ الخيانيين، اللي المدرسة ضبطتهم بيتشاقوا، ومرات ابني بتجردنا من أسلحة الدمار الفاشل، اللي في إيدنا. وبعدين بكل ثقة وهدوء، بتجيب فوطة، وبترميها على اليمامة، وبعدين بتمسكها بكل حب وحنية، وبتقولها حاجة في ودنها، وهي بتبص ناحيتنا، وبعدين بتطيرها في الجو.

حقيقي إن بعض الظن إثم، بس عندي إحساس إنها حذرت اليمامة مني ومن إبني.

كل دا، علشان بالصدفة البحتة يومها الصبح، هي سمعت

إبني حبيبي، بيطلب مني، إني أعمله ملوخية بالحمام؟

الله أعلم.

الزيارة

عرفته منذ الصغر، ولكن لم تتكرر لقاءاتنا، إلا منذ ستة عشر عامًا، أعوام طويلة. كانت أكثر من كافية، لكي أكرهه، وأتوجس من زيارته القادمة، والتي تأتي دائماً، بغير ميعاد مسبق. فأفضل وصف لعلاقتنا هو، إنه حب من طرف واحد، طرفه هو.

قبل أن تظنوا بي الظنون، اسمحوا لي أن أكشف عن هوية الزائر الثقيل، إنه الألم. وفي حالتي، هو بالتحديد، ألم الظهر. كان الألم في زيارتي بالأمس، وبما أن حضوره وما أتناوله من أدوية- تعينني على تحمل استضافته- منعوني من الهروب خارج المنزل، أوحى من القدرة على القراءة بتركيز، أو تصفح النت، ففكرت أن أدفن كرهى له، ولو لدقائق معدودة. أحاول فيها أن أتجاوز معه، على أمل إقناعه بالخروج من حياتي بلا رجعة.

- طب والله أنت شكلك محترم، وابن حلال، ومش لايق عليك دور ”زكي رستم“ دا خالص!!
- ”زكي رستم“ مرة واحدة؟ وياترى تقصدي دوره في نهر الحب، ولأ في أنا وبناتي؟
- إيه دا؟ دا أنت غاوي أفلام قديمة زيي أهو.
- ومين مش غاويها؟ تحبي اسليكي وأغنيلك ابعده يا شيطان ؟
- ؟

- معناها إيه النظرة دي؟
- بصراحة أنت اللي فكرتني بالأغنية، ولقيتني بدنن في راسي إبعد ياوجع الظهر.
- أنت معتبراني أنا والشيطان واحد؟ الله يسامحك!
- مش قصدي بس يعني اللي يستمتع بعذابي، دا أكيد مش سيكون ملاك!
- أستمتع بعذابك؟ ياساتر، يارب، دا أنت واخدة فكرة زي الزفت عني. فعلاً خيرا تعمل، شراً تلقى.
- خير؟ من إمتى كان الألم خيراً حتى لو ماكنتش بتستمتع بعذابي، زي مابتدعي.
- طب استهدي بالله، وإديني فرصة أدافع فيها عن نفسي، أقولك، خليني أفكرك بحلقة تليفزيونية قديمة.
- إتفضل، بس للأسف في الغالب مش حأفكرها، لإن ذاكرتي بقت بعافية شوية.
- لأ، أنا متأكد إنك هتفتكري، لإن اللي هحكيهولك دا، هو من الذكرى الموجودة في عقلك، من غير زيادة أو نقصان، المهم المسلسل كان عن طبيب أمريكي، إسمه «بن كاسي».
- يادين النبي، ودا إفتكرته إزاي ده؟
- بقولك أنا بحكيلك من ذاكرتك، علشان أوصل لك فكرتي، الحلقة دي كانت عن مريضة تشعر بالآم مبرحة في قدمها. مش واضح لي طبيعة المرض أو الإصابة- واضح إن

- ذاكرتك مخسعة بجد- المههم إنها طلبت من بن كاسي، أنه يقوم بجراحة لتعطيل العصب الي يسبب لها الألم.
- أيوه إفتكرت، أنا دلوقت شايفاهم في آخر الحلقة، ماشيين على شاطئ البحر، والمنظر رائع.
- وبعدين، حصل إيه بعد كده؟
- أفتكر الكاميرا عملت زوم على آثار أقدامهم على الرمال.
- جميل وبعدين؟
- مرت الكاميرا على صخور في الرمال، وبعدين الحلقة خلصت.
- لأ، بعد مشهد الصخور، شفنا الرمال إتغير لونها.
- أيوه، عليك نور. بس دي حلقات من زمن الأبيض والأسود. فأفتكر أني مافهمتتش الي حصل، لحد ما بن كاسي لاحظ الدماء، وشالها وجرى بيها لإنقاذها.
- بالظبط.
- فهمت، قصدك إن غياب الأم- سيادتك- الي سعت له المريضة، كان حيكون السبب في موتها.
- الله ينور.
- أيوه، بس أنا وضعي مختلف.
- أنا عارف إنك فاهمة إزاي وجودي برضه مهم لحالتك، مع اختلاف التفاصيل.
-

- وحدوووووووه.
- لا إله إلا الله.
- لسه زعلانة مني وبتكرهيني؟
- تشرب إيه؟



رمضان جانا

مش حأخاف أعترف، خصوصًا إن الوحيد اللي يهمني في الموضوع، أصلًا مُطلع على اللي في قلبي، فحأعترف إني مش بأكون مبسوفة مع قرب رمضان.

وأنا صغيرة، كنت عايضة أخترع إمساكية لرمضان، بس بدل ما تقولنا مواعيد الشروق والغروب، تحدد لنا نساfer فين كل رمضان، لكان يكون فيه النهار أقصر ما يمكن، والجو يكون معقول كمان، لإني بأجوع في البرد، وبأعطش في الحر، وسميتها، أين تذهب هذا الرضان؟

قبل ما حد ما يتهور، ويقول عليًا كلام مش ظريف، ولو في سره، أحب أشرح أسبابي.

أنا إنسانة نهارية، يعني أحب اصحى بدري، وكل طاقتي ونشاطي بيطلعوا مع الشمس، وبأحب طول النهار، زي ما بأشغل مخي، أشغل بقي، بأكل او شرب. وأول ما الدنيا تضلم، كل دكاكين مخي بتقفل، وأبطل أكل أو أشرب، وبالكتير أوي أقعد زي الزومبي أمام التلفزيون.

طبغًا النظام دا مينفعش في رمضان بتاتًا. فكل سنة، ومع قرب رمضان، بأحقد على الشخصيات الليلية، اللي صيام رمضان بيناسبها أكثر مني.

لكن مش عارفة إزاي، «سم هاو» بتعود بعد يومين ثلاثة، وأقول لنفسي: إيه دا؟ الصيام مش بالصعوبة اللي كنت فاكرها.

لكن اللي بيفقع مرارتي، بعد الشر عليًا، ومش بتعود عليه

أبدًا، هو استخدام الصيام كحجة، لسوء سلوك أو نرفزة زائدة. نقول مثال علشان متقولوش عليًا مفترية. كنت مسافرة في يوم من أيام رمضان، فأنا استعملت رخصة المسافر وفطرت. أغلب اللي كانوا مسافرين معايا على الطائرة، مأخدوش بالرخصة وصاموا، حقهم. المشكلة إن الرحلة اتأخرت، فبدل ما وقت الفطار يبقى بعد الإقلاع بساعتين تقريبًا - مش عارفة بتتحسب إزاي في الطائرة وهي طائرة ومش عايضة أعرف - بقى موعد الفطار هو تقريبًا نفس موعد الإقلاع.

وعليه ، خناقات ملهاش آخر مع طاقم الطائرة، كله عايض يفطر، وطبعًا تحضير الأكل وتوزيعه بياخد وقت، والركاب عندهم «هاييو جلايسيميا»، وطاقم الطائرة الأجنبي مش مقدر الموقف، والطيار لازم يطير علشان البرج قاله يطلع، والنجار عايض مسمار، والمسمار عند الحداد، وإديله.

طيب بالذمة، مش كان فطروا وعضوا اليَوْمَ بعد رمضان أحسن برضه؟؟

أنا متأكدة إن كل حد فينا عنده بدل القصة، عشر قصص عن مواقف مشابهة.

وكل رمضان نلاقي ميت سؤال للشيوخ عن الحكمة من الصيام، ولمؤاخذه يعني، مافيش إجابة بتقنعني.

بالنسبة لي، انا بلاقي الصيام أفضل تدريب على التحكم في النفس، لإن الامتناع عن الأشياء المسموحة في غير رمضان، يسهل الامتناع عن غير المسموح طول السنة.

علشان كدة بيجيلي صدمة وانهييار عصبي، لما بأسمع عن تحرش في عيد الفطر، مش بس لبشاعة الجريمة، لكن كمان لإننا لسة طالعين من شهر الصيام عن المعاصي. فيه دكتور صاحب جوزي كان بيكلمنا عن بعض مرضاه اللي مخهم لامؤخذة زلطة، واللي بيصمموا يصوموا بالرغم من إن حالتهم الصحية ممكن تسوء بالصيام. بعد ما أكثر من شخص، كرر الكلام اللي كلنا عارفينه وحافظينه، صاحبنا ده - يظهر إنه متخصص في المختصر المفيد - قال:

- أنا شخصياً لما بيجيلي حالة ممكن يضرها الصيام بقول لها: خليك صايم بس كُل وإشرب!

من سهولة وبساطة العبارة، مافهمتاش على طول. لكن بعد ما كررت اللي قاله في دماغي، الحمد لله فهمت. فعلاً ليه دايماً مركزين على الامتناع عن الأكل و الشرب، و بننسى إن الصيام دة أساساً، امتناع عن الأذية، وتشجيع للخير اللي جوانا.

ليه فاكرين المعنى الظاهري وناسيين الحكمة الأوسع للصيام، ناس كتار مايقدروش يصوموا علشان المرض، أو السفر، أو لطبيعة العمل، أو لصغر أو كبر السن. لكن ما فيش حد عنده أي حجة إنه مايصومش عن المعاصي، وأذية الناس، يبقى مين اللي أهم؟

ينصر دينك، يا دكتور يا مختصر يا مفيد، وكل سنة وكل الناس اللي صايمين عن الأذية طيبين.

بحب السيما ١

أيوه، بحب السيما، وكان نفسي وأنا صغيرة أطلع مخرجة أو ممثلة. والظاهر إني كنت غاوية تهريج من زمان، فأعز صديقة ليّا في المدرسة تنبأت إني حأكون خليفة زينات صدقي في السينما المصرية.

لما مافلحتش في الفن ودخلت هندسة، بقت أسعد لحظات حياتي هي الفرجة على فيلم يعيشني جواه، وينسيني إني بتفرج على فيلم أصلاً.

وياسلام بقى لو الفيلم قدر يعمل فيّا حاجة من اتنين، يضحكني أو يبكينني.

أما يوم السعد والهنا، فدا لما الفيلم يضحكني ويبكينني، سوا سوا.

مش فاكرة أمثلة كتيرة للأفلام دي، لكن آخر فيلم عربي أتّر فيه كده، يعني ضحكني وبكاني، كان الفيلم الأكثر من رائع: يوم الدين.

الفيلم كان بقاله أربع أيام في السينمات، وكنت أولردي دخلته مرتين، أول مرة مع مجموعة كبيرة من الأصدقاء والمعارف في حفلة خاصة. انبهرت، وفضل معايا في الحلم والعلم، فقررت أدخله تاني علشان أشبع منه، وأقدر أسلم على أبطاله، وأودعهم ولو لفترة.

فيه كمان أفلام حديثة عجبنتني زي فوتوكوبي، الرائع؛ وعلي معزة وإبراهيم، اللي شدني وعجبني جداً. مع إني ماليش في الحيوانات خالص،

وخصوصا المعيز، لإنهم بيفكرون بالقصص المرعبة اللي جدتي كانت بتحكياها، عن الراجل أبو رجلين معيز.

نرجع للأفلام علشان ابتديت أخاف.

بأحب الأفلام الكوميدي، بس من غير ما ممثلة ترمي تورتة بالكريمة في وش جوزها، أو ممثل يدمر الديكور علشان نضحك، المشاهد دي ما بتضحكنيش مطلقا. بالعكس، بأنسى الفيلم وبأسرح وأنا متنكدة لإني بفكر وأنا قلقانة، ياترى إمتى ومين اللي حينصف الأستاذو؟ وإزاي حيلحووا كل الحاجات اللي اتشدشت دي؟

من الأفلام الكوميدية الجميلة فيلم Il Postino، كوميديا راقية تحترم المشاهد، وكله شعور جميل، والنكد في آخر دقيقتين فقط. لكن المشكلة إني عارفة اللي حصل للبطل بعد ساعات من انتهاء تصوير الفيلم، فالنكد بيتدي عندي بدري شويه. شكراً، أو منك لله، ياهبة يا صديقتي، علشان عرفيتني بالفيلم دا.

فيه كمان فيلم Pay it forward، بحبه جدًّا، في شعور جميل طول الفيلم. بس مؤخرا بقيت بأغير المحطة قبل آخر عشر دقائق، لإني بأتعب من نهايته، ومباعرفش أبطل عياط، إلا تاني يوم، بعد الظهر.

بس مش عارفة شعوري حيكون إيه لو اتفرجت على نفس الفيلم دلوقت. بعد ما عرفت إن حوالي عشرين شاب، اتهموا كيثن سپاسي، بالتحرش، مع انتشار حركة Me too !!

الغريب بقى، هو إني أحياناً أشوف أفلام؛ كل اللي اشتغلوا فيها- من المخرج إلى عامل البوفيه- كانوا قاصدين يخلونا نعيط. وناس كتير فعلاً بتعيط، بس أنا بقى، ولا حتى بأدمع، ليه؟ في الغالب لإن الفيلم مش بيعيشني جواه، وطول الوقت بأكون واعية إن دا فيلم، ودول ممثلين، والقصة خيال، ومصنعة .

عندي أكثر من مثال على الأفلام دي، لكن مش حاقول أسماءهم، علشان في الغالب حزعل ناس كتير. لكن أشهرهم- على الإطلاق- فيلم أول حرفين من اسمه، Love Story!! على فكرة، ولإني وارثة الطبع دا من والدتي، كنت فاكرة إن كل الناس ذوقها في الأفلام زينا، وإن العياط في الأفلام الكوميدي دا شيء طبيعي.

أول مرة اكتشف أني «مختلفة»، عن معظم البشر، على الأقل في موضوع الأفلام دا، كنت بقيت أم، وعندي ثلاث أطفال.

الفيلم كان اسمه Angels in the outfield، فيلم عن رياضة الـBaseball، وولد صغير بيطلع له ملاك، وبيحاول يساعد فريق الـAngels، اللي أبوه بيحبه، علشان يكسب البطولة

زي ما هو واضح، فيلم طفولي جداً. بس مش عارفة ليه، اتأثرت بيه، وآخر نص ساعة في الفيلم، مابطلتش عياط. لما الفيلم خلص، لاحظت إن مافيش أي حد بيعيط غيري.

وكل اللي بيشوف دموعي، حواجه بتترفع لحد ما يتلمس شعر رأسه، وكأنهم شافوا مخلوق من كوكب تاني!!
فاكرة كمان فيلمين، ضحكت وبعيت فيهم، نتيجة ظروف خارجة عن إرادة المخرج، وإرادتي أنا كمان.

الأول كان فيلم Mystic River، إخراج كلينت إستودود اللي بكره آراءه السياسية لكن بحب أفلامه، لإن دائماً فيها شعور، والفيلم دا بالذات، فيه مشاهد مؤثرة جداً.

كنت في تورونتو لما الفيلم نزل في السينما، سألت أولادي لو حد يحب يبجي معايا. الثلاثة قالوا: لأ. فدخلته لوحدي، والحمد لله إني دخلت في الضلمة، فبعيت براحتي، وخرجت بسرعة أول ما الأسامي ما نزلت، علشان خفت يكون في حد من أصحاب أولادي موجود في الحفلة، يروحوا يقولولهم: مامتكم هبله!

وبعدين رَوحت مشي في عز برد شهر فبراير، علشان إتكسفت أركب الصاب واي، أو تاكسي، وأنا بعيط بصوت عالي .

الظاهر إن صوتي كان عالي بجد، لإن وأنا مارة جنب السيتي هول في باي ستريت، راجل نايم تحت كوبري المشاة شال الغطاء من على راسه، وسألني لو أنا بخير، طمنته وشكرته. بس زعلت من نفسي جداً، إني بأعيط جامد كده على فيلم. لكن في الوقت نفسه مش بتأثر بالدرجة دي لما بأشوف ناس نايمين في الشارع، وخصوصاً في برد كندا القارص. فالنكد زاد عليه تأنيب الضمير!!

بعد كده بشهور، كنت في البحرين، فأنا و"منصور" وصحبتى "هبة" قررنا نروح السينما. ماكنش فيه أفلام كويسة غير Mystic River، وبما إني شففته خلاص وعارفة الأحداث، فقلت لنفسي إنها مش حتأثر بيها تاني، واقتרכת إننا نتفرج عليه سوا.

المأساة هي، ولإني إفتكرت أحداث الفيلم، وكمان افتكرت الراجل الهوملس، لقيت نفسي ابتديت أعيط بعد عشر ثواني من بداية الفيلم، فصاحبتى وجهت كلامها ل"منصور" وقالت:

- يا عيني عليك، يا"منصور"، مش كفاية متجوز واحدة موسوسة؛ لأ، وكمان نكدية!!!

طبغًا، أنا سمعت اللي هي قالتة. من هنا، وابتديت أضحك من هنا - بس العياط كان لسة مكمل معايا - فلقيتها بتقوله:

- لأ، دي كمان مش طبيعية، بتضحك وتعيط في الوقت نفسه!!!

طبغًا دي كانت آخر مرة أروح فيها السينما مع "هبة"!! في موقف تاني، مشاعري المرهفة اللي ما حدش بيقدرها، كانت حتطفش متفرجين محتملين لفيلم كوميدى.

الفيلم كان غسل أسود. حبيته أوي علشان كتير من اللي أحمد حلمي قاله وعمله، فكرنى بأولادي لما بيزوروا مصر. وبعدين مع تتر الأسامي، سمعت أغنية «فيها حاجة

حلوة». كنت أول مرة أسمعها، فغصب عني، دموعي نزلت.
والشحتفة اشتغلت.

كان فيه شايبين واقفين برّه، منتظرين خروجنا علشان يدخلوا
الحفلة الجاية. لما واحد فيهم شافني، قال لصاحبه بغضب:

- كوميدي إيه ياعم. دا في ناس طالعة مفلوقة من العياط.

الشاب التاني سأل "منصور":

- هو الفيلم نكد؟

- لأ، دا كوميدي وظريف جدًّا والله.

فالشاب بص لي باستغراب.

"منصور":

- لأ، ملكش دعوة بيها، دي كانت في فيلم تاني.

أنا، دايجا فو، عياط على ضحك.

ليه بس ياربي خلقتني حساسة كدة؟؟؟



بحب السیما ٢

زوجي اكستروفرت، بعد إذنكم، حأروح أشوف ترجمتها
إيه وأرجع على طول. طلع اسمها «منبسط».

يعني لو عايزين نقيس قد إيه منصور منبسط، وعلى غرار
مقاسات الملابس، هو هيكون XXX-منبسط.

فعلشان يملى بطارياته، لازم يكون حواليه ناس كتير، كتير جدًّا.
فيحب يتفرج على الأفلام في صالات العرض، وكل ما كانت زحمة، يكون
أفضل.

وبما إن أنا إنتروفرت، أوباللا، طلعت ترجمتها انطوائية.
الحقيقة، XXX-انطوائية، فبأفضل أتفرج على الأفلام في
البيت، أو في عروض خاصة، وياريت ماحدش يتنفس في
أثناء العرض.

ولإني كمان بأتعذب لو إتفرجت على فيلم وحش؛
فمؤخرًا، بقيت بكره دخول السينما إلا بحكم القوي - "منصور"
- على الضعيف- أنا.

دخلنا السينما في الإسكندرية. صممت ندخل حفلة
متأخرة علشان أضمن إن الأطفال أحباب الله يكونوا ناموا.
عشم إبليس في الجنة!!

الشاشة بتعرض العروض القادمة، وإحنا حوالينا القروود
الحالية. كمية أطفال أكثر من الكبار، بيجروا حوالينا وييلعبوا
صياد وحمام.

- طيب ماتقلاقيش، أنا حأطلع أشوف المدير.
 خرج "منصور" ورجع بواحد، ماشكلوش مدير مطلقاً.
 - لو سمحتم، الأهالي الي معاها أطفال، لازم يقعدوهم
 جنبهم، ويلتزموا بالهدوء، وإلا حأضطر أطلعهم برّه.
 - تعالى، ياواد "يا تامر"، وإنّت "يا طارق"، اسمعوا كلام عمو وإلا
 حيضربكم!!

بدأ الفيلم

- شفتي، أهو كله تمام. ريلاكس واتفرجي.
 فجأة، صوت "هيفاء وهبي" لعلع في الصالة.
 - شوف الواوا، بوس الواوا، قول للواوا دح!
 - لأ، كده كثير.
 - يابنتي هدي أعصابك. أكيد دا واحد نسي يقفل الموبايل، دلوقت
 يقفله.

- أيوه، ياجمال، إنت فين، يا معلم؟ تليفونك كان خارج الخدمة. أنا
 في السيما. فيلم جامد جدّاً. إيه؟ طب اسمع، ولو شاطر تعرف فيلم إيه.
 - لأ، كده كثير أوي!!

- بطلي كلام، عايز أسمع الفيلم.
 - بتتكلم جد؟ بقى في كل المولد الي إحنا قاعدين فيه
 دا، وأنت مش سامع الفيلم مني أنا؟

واحد قاعد في آخر الصالة فجأة انفجر زي البركان وقال:

- هو أنا دافع الشيء الفلاني علشان أتفرج على فيلم

وانبسط ؟ ولا أنا دخلت جنينة الحيوانات بالغلط؟ شوية عيال بتلعب مساكة، وشوية بيلعبوا أفلام، وهيفا عندها واوا، هو في إيه، ياجدعان؟ عليًا النعمة لو ماسكتوش لأقلبهلكم ضلمة
 اكثر ما هي مضلمة!!!!

أخيرًا!! هدوء تام لآخر الفيلم.

- شفتي بقي، أهي اتحلّت بالجهود الذاتية.

جايز ناس تشوف المواقف اللي بتحصل دي طبيعية، وأنا اللي بتلكك، وجايز تكون تخليص ذنوب، لكن كل مرة بقول "لمنصور" - آخر مرة أروح معاك السينما.

وهو يقول:

- ليه بس؟ دا أنا اتبسط أوي!!



في ذكرى رحيل والدي

أبويآ، الله يرحمه، كان أحن وأطيب أب. ولما جيت أطفال،
اكتشفت إنه كمان، أحن وأطيب جد في الدنيا.
كان طبيعى إن ولادي يحبوه ويحترموه جدًا. بس للأسف،
كل واحد فيهم عمل فيه مقلب غير مقصود، بس الحمد لله إن
والدي روحه رياضية، ومزعلش منهم. خصوصًا، إنه لما عرف
السبب، بطل العجب؛ لكن أكيد إتحسر، على اللغة العربية.
ابني ”علي“:

”علي“؛ للناس اللي مش عارفاه، محترم جدًا. من وهو صغير، أنا
شخصيا كنت بأخاف أعمل أو أقول أي حاجة غلط قدامه، علشان مايزعلش.
في يوم، كان بابا يلعب مع ”علي“، ويقراله كتب أطفال،
والاتنين سمن على غسل. وفجأة لقيت الموود إتغير، وبابا
بيقول لإبني:

- لأ، كده عيب، يا حبيبي، ماتقلش كده تاني.

No Gedi I will -

- لأ، كده عيب.

Why Gedi I want to -

- علشان دي كلمة وحشة، نهلاا!! تعالي بسرعة.

- خير، بابا، فيه إيه؟

- مين هنا بيقول كلام سخيف كده؟ وخصوصًا قدام

”علي“ .

طبَّعًا شكيت في ”منصور“ على طول، بس قلت وأنا
مرعوبة :

- هو قال إيه؟

- لأ، مش حأكّرر اللي قاله تاني، حأقولك بعدين.

- جدّو، أنا عايز أوريك الويل!!

- شايقة!!

- ”علي“، حيببي. بليز ماتقلش كدة أبدًا!! دا كلام بيقوله

الباد بوي!

يبكي ”علي“ ويغادر الغرفة.

- لازم تخلوا بالكو وماتقولوش كلام زي دا قدام الأولاد

تاني أبدًا

- حاضر يا بابا، حقك عليّا. بس إحنا عمرنا ما بنقول التعبير دي!

- أمال سمعها فين يعني؟؟

يرجع علي وفي إيدته كتاب للحيوانات.

يفتح الصفحة على صورة الحوت ويقول:

!!!See Gedi, here is the whale -

بنتي ”ناهد“:

لما ”ناهد“ دخلت المدرسة، كان كل يوم الساعة ١١:٣٠

بالضبط، يكلموني في التليفون، ويطلبوا مني اروح أخذها لإن

عندها مغص رهيب!!

طبَّعًا بعد أسبوع فهمنا إن دا ميعاد حصة العربي، هي معذورة شوية، لإن حتى أنا كنت بأخاف من ”مسز عمودي“، المدرسة اللي بتدرس عربي في المدرسة الأمريكي.

حاولنا مع ”ناهد“ كل الحيل اللي الأهل بيلجئوا لها في الظروف دي: رشاي، محايلة، زعيق.. مافيش فائدة.

وفي يوم، تمكّن مني اليأس وقلت:

- خلاص نطلعها من العربي.

- لأ، إزاي كدة، يعني عايزاها تطلع مابتعرفش عربي؟

دا كان بابا، كان عندنا في الظهران في زيارة قصيرة.

- أنا جربت كل حاجة، والله، يا بابا.

- لأ، بلاش دلح!! أنا حأذاكرها العربي وحتشوفي حتجبه

إزاي.

- هايل، شكرًا جدًا.

- ”ناهد“!! هاتي واجب العربي وتعالى.

ترجع ”ناهد“ بالكراسة، وبطاجن ستها فوق رأسها.

- تعالى، حبيبتى. افعدى جنبى هنا، فين الواجب؟

- ‘We have ‘addad

- هي بتقول إيه؟

- قصدها أضداد، يعني تعرف الكلمة وعكسها.

- طيب مايقولوا كده.

- أصلهم بيدرسولهم منهج الأردن، فاللهجة مختلفة شوية.

- أوكي مافيش مشاكل. فين الكلمات، يانونا؟ دي؟ أول كلمة ناعم، ناعم يعني soft، يبقى عكسها إيه؟

I don't know -

- لأ، حنتكلم عربي، عكس ناعم، خشن.

- شخن

- لأ، خشن مش شخن.

- شخن.

- لأ، خشن.

- شخن.

- وبعدين بقى؟ شخن.

I said - شخن جدو

- قصدي خشن، لخبطيني!! خ ش ن، خشن!!!

- شخن جدو and please don't shout -

- نهلاااا!! تعالي خدي بنتك، وياريت تتطلعها من

العربي من فضلك!!

ابني "محمد":

ممکن نَعذر "علي" و"ناهد" لإنهم كانوا أطفال، لكن

"محمد" كان عنده حوالي ١٦ سنة، لما عمل أكبر مقلب في

جده.

كان بابا وماما بيزورونا لإني كنت عاملة عملية في ظهري،

و"محمد" كان في الظهران في أجازة من مدرسته الثانوي في

كندا.

حسّيت إن بابا زعلان من حاجة، بس لما سألته قال:
مافيش. فقلت: جايز بيتهيا لي. وبعد كام يوم، هو وماما سافروا
بالسلامة .

وبعد يومين، ”محمد“ دخل عليّ انا و ”منصور“ وقال:

- أنا حأعمل شاي، حد يحب يشرب شاي معايا، أنا

قلت :

- لأ، شكرًا.

”منصور“ رد عليه وقال:

- مافيش مانع.

”محمد“ راح المطبخ ورجع بكوب شاي واحد، وابتدى

يشرب منه.

- أما أنت عايز الضرب صحيح، كسّلت عملي شاي

معاك ؟

- بابا أنا سألتك، وحضرتك قلت مافيش مانع.

- يعني فاكر أهو، أمال فين هو؟

- فين إيه؟

- الشاي

- مش قلتلي مافيش مانع؟

- يا فرحتي بشبابك!! إنت فاكر مافيش مانع يعني مش

عايز؟؟؟ مافيش مانع يعني I have no objection. يعني أنا

عايز شاي.

- وانت لازم تقوله كلام صعب عليه كده "يامنصور". ما أنت عارف إن ابنك خواجه.

وفجأة لاحظت الحزن على وش "محمد".

- مالك "مو"؟ في ايه؟

- أصلي افتكرت حاجة وزعلان أوي، ياحرام، ياجدو.

- خير إيه اللي حصل؟؟

- لما جدو كان هنا، كنت كل يوم قبل ما أروح حمام السباحة مع

أصحابي، أسأل جدو لو يحب يبجي معايا، فكان بيقول مافيش مانع، فكنت بأمشي وأسييه!!

- أأوووووبا، علشان كدة كان شكله زعلان؟؟ هو فاكرك

فاهم انه عايز يروح، وبعدين بتطنشه.

طيب ممكن أكلمه في التلفون؟!! - Oh my

- دا انت لازم تكلمه تعتذر.

- أيوه يا ماما، يارب تكونوا بخير، هو بابا كان زعلان من "مو"؟

- عرفتي إزاي؟ هو قاللي أن كل يوم "مو" يعرض عليه إنه

يروح البسين معاه، ولما يدخل يلبس ويجهز ، يطلع يلاقي

"مو" مشى وسابه. وأنا كنت بأهديه.. وأقول يمكن أصحابه

كانوا مستعجلين، أو مافيش مكان في العربية. أهو كل يوم

حجة علشان مايزعلش!!

- ياخبر!! طيب "مو" عايز يكلم جدو علشان يعتذر له،

ويشرحه الي حصل!

- هالو جدو، Sorry، Soooooo

!Please Let me explain what happened

الله يرحمك يا بابا.

يارب تكون في مكان أحسن مافيهوش اللخبطة دي.

ويارب تكون بتبتسم لما بأفكر المواقف دي.

واحشتني.



دخول إيکیا مش زي خروجها

كل اللي إتعاملوا مع إيکیا عارفين إن أول ما بنحط رجلنا على السلام المتحركة، اللي بتطلعنا لبداية المتاهة، إن العالم كما نعرفه بيتوقف، وبنغيب عن الوعي لمدة تتراوح بين ثمان واثني عشر ساعة. وبعدين بنصحى نلاقي نفسنا في الباركنج، ومعانا أكياس كتيرة، لحاجات في الغالب ماكناش محتاجينها، وكمان تخننين اتنين ثلاثة كيلو!!!

أحب أبشر ضحايا إيکیا، إني اكتشفت إيه اللي بيحصل.

إيکیا هي البوابة، لعالم موازي!!!

طبعاً حيطلع لي مشككين، وأعداء للنجاح، حيقولولي: ياسلام، إيه الكلام الفارغ دا! وحتى لو كلامك مطبوط، وفيه عالم موازي في إيکیا، أكيد مش إنت اللي حتكتشفيه!! كان اكتشفه حد في علم وذكاء إينشتين أو ستيفن هوكنج.

اللهم طولك ياروح!! أولاً إينشتين مات سنة ١٩٥٥، وأول محل لإيکیا في الولايات المتحدة افتتح سنة ١٩٨٥؛ أما بالنسبة لهوكنج، ومع وجود محلات لإيکیا في المملكة المتحدة منذ ١٩٨٧. لكن مافتكرش إنه كان عنده بيت في الساحل الشمالي، واحتاج يفرشه من إيکیا، ولا كان فاضي يشتري شموع، متوفرة في سبع أحجام، وسبعتاشر لون، وسبعة وعشرين ريحة.

عموماً، بلاش كلام كبير. كفاية إننا نقول إن داخل إيکیا، طبيعة الأشياء مختلفة عن طبيعة نفس الأشياء دي برّه إيکیا:

١. الحركة

الحركة جوه إيكيا أبطاً منها برّه إيكيا حوالي ثلاثين مرة، لأنك لو قعدت على أي كنبه أو كرسي معروضين في إيكيا، وابتديت تراقب مجموعة من الزبائن، حتلاقي إنهم بيتحركوا ببطء شديد، وكأنهم لسه متعلمين المشي، ومستنيين حد من الستاف يبجي يغنيهم: تاتا خطي العتبه، تاتا واحدة واحدة.

٢. المسافات

المسافات جوه إيكيا هي في الحقيقة أطول بكثير من المعلن. إيكيا بتدعي إن مجموع الخطوات اللي لازم نمشيها علشان نخلص المتاهة اللي فوق واللي تحت، تتراوح بين 1500 و2000 خطوة. ومع ذلك، فحتى بطل العالم في المشي، بيخلص اللفة الكاملة في ثلاث ساعات ونص؟؟

٣. الستاف

عندي إحساس إن نفس العاملين موجودين في كل الفروع. أنا زرت على الأقل سبع أو ثمان محلات لإيكيا ، في خمس بلاد مختلفة ، وامبارح لما رحنت أطلب مساعدة أحد العاملين، لاقيته بيقولي: حضرتك سألتيني عن نفس السوفا بد دي قبل كده، بس عن اللون الرمادي!! دا فعلاً حصل، بس من ثلاث سنين، في كندا!!!

٤. الشورت كتس

في جوه المتاهه اتنين شورت كتس في كل طابق، من خلال ستارة مايعرفهاش إلا العاملين بإيكيا والزبائن المخضرمين زيي. المشكلة إن الحاجة اللي بأدور عليها دائماً وبالعند، بيحطوها

في الجزء اللي اختصرته!!! فبدل ما أختصر الوقت، بأطوله.

٥. الكافتيريا

مهما كنت واكل وشارب قبل ماتروح إيكي، فبمجرد إنك توصل لمكان الكافتيريا، بيجيلك رغبة ملححة في الاحتفال بالوصول لمنتصف المتاهة بالسلامة، وبتحتفل بالأكل والشرب في الكافتيريا، وخاصة الأطباق السويدية الشهيرة زي الميت بولز.

٦. الطعام

سمعت إشاعة إن الميت بولز اللي بيقدموها في إيكي، هي في الحقيقة لحوم الناس اللي دخلت إيكي وتاهت، فماعتش تطلع. يعني فيه احتمال إن أول جزء من اسم الوجبة يطلع عربي مش إنجليزي!!

٧. البضاعة

شكلها حلو وهي متركبة ومعروضة في المحل، بس لما تروح وتفتح الصندوق، وتحاول تفك شفرة تعليمات التركيب، بيجيلك انهيار، وتبتدي تدعي على كل ما هو سويدي، من أول فريق الأبا، ومروراً بلاعبي التنس بوج وإدبرج، لحد عربيات الفولفو.

وفيه كمان ظواهر غريبة أخرى كثير، بس أغرب ما في الموضوع.
وبالرغم من كل اللي ذكرته دا، إني أدمنت المكان، ومش عارفة أبطل أزور
إيكيا، أشترى حاجات مش محتاجها، وبعدين أروح الكافتيريا علشان آكل
الميت بولز!!

HELP!!



السيرك.

كنت بافكر ليه السيرك مالوش جمهور في بلدنا، وطبعاً الجواب المنطقي في بلاد غاب عنها المنطق هو، لإننا عايشين في سيرك، فمين العيبط اللي حيروح يرمي فلوسه، علشان يتفرج على حاجة عايش فيها ليل نهار!!!
 خليني أضرب مثل بالسواقة، مش محتاجة أكمل؟ لأ، برضه حأكمل علشان أفضفض، ولإني حقانية، أقر وأعترف إني جزء لا يتجزأ من السيرك، فأنا معايا رخصة وبأسوق منذ كنت في أولى هندسة، وفضلت أسوق أربع سنين، لحد ما اتخرجت واتجوزت وسافرت، من غير ماعمل امتحان السواقة!!

بالعربي كده، إتمرنت فيكم!! بس أرجوكم بلاش تعملولي فيها ضحية، لإني متأكدة إن معظمكم كمان أتمرن فيا.
 لما عشت برّه السيرك اتعلمت السواقة على أصولها، وعرفت معنى علامات المرور وقوانين الطرق لأول مرة في حياتي، وإن في حاجة إسمها أحقية الطريق، وإن الحكاية مش فتونة.

أما أكبر إكتشاف، فكان إن إشارات الدوران دي مفروض نستعملها، ومش بس لما نكون حنحود يمين أو شمال، ولكن كمان لما نكون حنغير الحارة اللي إحنا فيها!!!

بعد ما الأجانب ما لعبولي في دماغي، ونسوني كل اللي إتعلمته في شوارع أم الدنيا، ورجعت. كان قراري سهل، مش سايقة!!
 اعتمدت على زوجي العزيز، والكباتن من أوبر وكريم.

لكن تقريبًا كل مرة أركب معاهم، كان بيدور بينا الحوار
التالي :

- على فكرة أنا مش مستعجلة.

-؟؟

- يعني ممكن حضرتك تسوق أبطأ من كده.

- ماينفعش، يامدام ، بعدين اللي جاي من ورايا يخبطني.

- ما هو ممكن ناخذ الحارة اللي على اليمين ومشي أبطأ.

- والله ماينفع برضه يامدام. دي حارة المايكروباس أو لي فاتح على

آخر سرعة. هو حضرتك كنتي عايشة بره ولا إيه؟؟

- طيب بص قدامك وحياتك وخلي بالك من

الموتوسيكل اللي قدامك دا، إيه دا؟؟ دول العيلة كلها والبيبي

كمان، حاسب حاسب!!

- ماتخافيش، يامدام، احنا واخدين على كده.

- أنا خايفة على الأطفال والبيبي دا، ولا واحد فيمن لابس خوذة.

- خوذة إيه بس، يامدام، إحنا ماعندناش الكلام دا.

- طيب ممكن نركبهم معانا؟

- نركبهم فين حضرتك؟ ويعدين ما الشارع مليون،

حزكب مين ولا مين؟؟ حضرتك بصي الناحية الثانية، أو

اتفرجي عليهم كأنك في سيرك الحلو.

- هو فعلاً سيرك، بس مش حلو خالص!!!

عروستي

- عروستي.
- ناشطة سياسية يسارية. ولدت سنة ١٩١٩ وسجنت في الخمسينات لمدة ١٠٠ يوم.
- إيه دا؟ ودي حأعرفها إزاي؟
- والله دي شخصية معروفة جدًّا، بس كمل لعب
- طيب، عروستي.
- حاورها إدوارد سعيد وكتب عنها مقالة شهيرة.
- يابنتي، أنا ماليش في المقالات والكتب الإنجليزي اللي بتقريها دي.
- وخصوصًا لو في السياسة أو الأدب بتوع إدوارد سعيد. خيلنا في العربي وحياتك.
- المقالة اترجمت عربي واتنشرت في جرائد مصرية، بس مش مشكلة، كمل لعب وإنْت حتعرفها.
- عروستي.
- جاء ذكرها في كتابين من أكثر الكتب مبيعًا في ٢٠١٨، المولودة والزوجة المكسيكية.
- للأسف برضه ماقراُتهمش. سيبك من الكتب والثقافة وكلميني عن حياتها الشخصية وأنا اجيبهالك على طول.
- عروستي
- إنسانة خيرة جدًّا، أنفقت الكثير على الآخرين، وقامت

- بتربية بنت أختها ثم تبنت صبية بعد ماتت عامها السبعين.
- إيه هو دا! دي مش مفاتيح لحل الفوزرة. دا كل مفتاح بيصعبها أكثر وأكثر.
- أقولك، خلاص بلاش من الشخصية دي خالص.
- حأقولك فوزرة سهلة حتعرفها على طول.
- أيوة كده. عروستي.
- راقصة غيرت الصورة النمطية عن الرقص الشرقي ونظرة المجتمع للراقصة.
- أهو كده الكلام!! عروستي.
- ممثلة بارعة شاركت في حوالي ٢٠٠ فيلم و٢٠ مسرحية.
- أفكر عرفتها. بس علشان أتأكد عروستي.
- تزوجت ١٤ مرة، وأشهر أزواجها...
- بس! بس! خلاص عرفتها. تحية كاريوكا!
- أخيراً. عموما عليك نور.
- أخيراً إيه يابنتي؟ دا أنا عرفتها بعد ٣ عروستي بس.
- وحتى قبل ما تكلمي الدليل الأخير.
- لأ وأنت الصادق. أنا قولت لك معلومات كتيرة عنها، لكن أنت اللي ماخذتش بالك.
- المهم وقبل ما أنسى. مين بقى الست الأكتيفست اللي كنت بتتكلمي عنها في أول لغز؟ دي شخصية مشهورة بجد؟
- أيوه.

- ياترى مين؟
- نبوية محمد كُريم!
- عمري ماسمعت عنها.
- الشهيرة بتحيةة كاريوكا!!



ربنا يحب فيكي خلقه

كل ما كنت بأسمع الدعاء دا من أم، وهي في الغالب بتكون ممثلة في فيلم من أفلام زمان، كنت بقول لنفسى، إن دا أجمل دعاء اخترعته الأم المصرية.

والظاهر، والله أعلم، إن في أم منهم دعتي الدعوة الجميلة دي، لإن ربنا فعلاً حب فيا الكثير من خلقه. لكن مع الأسف، وبما إن الدعوة مش محددة فصيل من المخلوقات بعينه، فأنا - بعد إذنكم حأروح اهرش وأرجع على طول - طلعتلي أغلس وأتقل دم فصيلة من بين كل مخلوقات ربنا، الناموس!!

في الحقيقة هو مش دمه ثقيل، دا ما عندوش دم أصلاً، وعلشان كده يبجي يمص دمي أنا، وبدون أي رحمة. والغلاسة، إنه بعد مايشرب ثلاثة لتر من دمي، وبدل ما حتى يقول ثانك يو، بيسييلي كلكوعة حمرا، وإحساس قاتل بالحاجة للهersh.

أنا آسفة، بس أحب أقول لكل اللي قال: ”وأنا كمان، أنا كمان، الناموس يبجنني أنا كمان!“. عفوا، بس الناموس يبجنني أنا أكثر منكم كلكم!!

عرفت إزاي؟ لإني عملت تجارب متعددة، مع ناس من داخل ومن خارج العائلة، وكلهم كانوا بيشتكوا من الناموس، لكن أول ما بأكون معاهم في مكان فيه ناموس، الناموس ولا حتى بيعبرهم، وبيجيلي أنا.

صحيح هو إحساس جميل إن الواحد يحس إنه محبوب كده، بس ولو، قلبي مش حيرق، وحفضل أكرهه برضه،

وخصوصًا الناموسة اللي بتجيلي بالليل وأنا نايمه، وتقعّد تزن جنب ودي، زززززننننن، وأنا أفضل أضرب ودي، على أمل أني أموتها، لكن الناموسة مش بتموت، والنوم بيروح، وبفقد السمع في ودي لحد تاني يوم.

من فضلكم محدش يقولي على طرق أووصفات لمحاربة الناموس، لأني جربت كل حاجة، بغطي كل جسمي، وبرضه بيعضني من فوق الهدوم، بأحط ريلانت، ولا بيحجب نتيجة، اشتريت الكويل اللي بيطلع ريحة، ولا بتفرق معاه، حتى المضرب الكهرياء الصاعق، بأفضل ألعّب بيه تنس من غير كورة، وبحس بسعادة رهيبية لما بسمع صوت طقطقة، لما بيموت ناموسة. لكن طلع إنهم بيضحوا بناموسة أو اتنين كتمويه. بينما في جيش من الناموس، بيتعشى على دم رجلي!! الميزة الوحيدة للمضرب هي إن الباك هاند بتاعتني اتحسنّت جدًّا، يعني لو رجعت العّب تنس، كابتن محمود حيكون فخور بيا.

أنا من كتر يأسّي وإحباطي من فشلي في إيجاد حل مناسب، اتفرجت على حلقة من برنامج الدحيح - حلقات على اليوتيوب من إعداد وتقديم شاب جميل اسمه أحمد الغندور- بيتكلم فيها عن محاولات لعلماء حول العالم القضاء نهائيًا على الناموس، لكن للأسف الحلقة أكدت لي إنه لحد الآن، مافيش أي حل سهل.

بفكر أستغل الميزة دي، واعمل مشروع تجاري على غرار الشركة الألمانية لمكافحة الحشرات. بس أنا حتخصص في مكافحة الناموس، يعني اللي عنده فرح أو حفلة في الصيف،

وخايف الناموس يبوظله الحفلة، يتصل بيا، وأنا حوفرلهم
طريقة بسيطة وآمنة ومضمونة. كل الي حأعمله هو أي أحضر
الحفلة، وساعتها الناموس حيسيب كل المعازيم، وحيجيلي أنا،
وبكده أكون عملت بمبدأ:

.If you can't beat them, then use them



في حب حسين السيد

لما كلمات الشاعر "حسين السيد" البديعة، تتدلح على موسيقى اللواء الدكتور "محمد عبد الوهاب"، وبعدين تتغلف بصوت "نجاه الصغيرة"، أكيد النتيجة حتكون أغنية خالدة.

بس لما كمان تكون الأغنية عبارة عن قصة قصيرة متكاملة المعالم، يبقى الوجبة أكيد متميزة.

النهاردة كنت في حالة سلطنة وأنا باسمع ساكن قصادي. "نجاه" مغرمة بجارها، فالمزيكا وصوتها رومتيكيين، وبعدين هيصة وزمبليطة وحالة من السعادة والتفاؤل، علشان الفرع اللي في شارعها، ودعوات الجيران إنهم يفرحوا بيها قريب. تتخلل موسيقى الزفة جملة موسيقية غامضة ومخيفة تعدنا نفسياً للصدمة، لما "نجاه" تكتشف - وإحنا معاها - إن اللي حيتجوز - يعني العريس- - طلع حبيها!!!

هو في الحقيقة الراجل مغلطش لإن الحب كان من طرف واحد، يعني مافيش أي شخصية شريرة نكرها ونلومها، وندعي عليها، ومع كده الدراما مؤثرة جداً.

وفجأة، سمعت البيتين دول، وكأني باسمعهم لأول مرة، لإن وصلني معنى، بيعكس أخلاقيات كانت طبيعية ومنتشرة في زمن كتابة الأغنية، وللأسف أصبحت عملة نادرة في الزمن المهيب اللي إحنا فيه دا.

"حتى الأمل مابقاش من حقي أفكر فيه

بعد الليلة دي خلاص بقى غيري أولى بيه »

أخذت بالي إن بطلتنا الرومانتيكية، واللي بيجسدها صوت "نجاه"،
 قررت وبالرغم من جهها للجار إنها تدوس على قلبها، ومش بس متحاولش
 تقابله، أو تلفت نظره ليها، أو تقوله وماله أنا سألت شيخ، وقال لي من
 حقه أربعة. دي قررت انها حتى ملهاش حق تفكر فيه، لأنه بزواجه،
 أصبح الحق دا خالص لزوجته!!!

فين النبل دا دلوقت؟ للأسف، كل شيء راح وانقضى!

أذكر أيضا لشاعرنا أغنية قريبة جدًا لقلبي، بالرغم من
 إنها قد تبدو أغنية خفيفة، لكن شاعرنا العظيم أعطانا درسًا
 نحن في أمس الحاجة إليه في زمن التعصب، وطول اللسان،
 والتنازع بالألقاب والبطولات.

أكيد عرفتم إني أقصد أغنية، بين الأهلي والزمالك، ألحان
 اللواء الدكتور الزمكاوي :عبد الوهاب، وغناء الست
 "صباح"، وأنا كزمالكوية عتيقة، طالع روحي من ذل أصدقائي
 الأهلاوي، أشكر وأحيي شاعرنا العظيم على دعمه للروح
 الرياضية، وتذكيرنا جميعًا إن الزمكاوي، أخوه أهلاوي،
 والأهلاوي، عمه زمالكاوي، وإن الاتنين حلوين وطعمين
 وجامدين .

تحياتي الخاصة لشاعرنا العظيم، حتى، أو خاصة ، لو كان
 أهلاويًا.

أنت القلب الكبير

طبيب القلب، العربي الأصل، الأمريكي الجنسية، خريج جامعة هارفرد، والي اكتشف إن حجم قلبك، أكبر من المعتاد، والي شرحلي إن عكس المتعارف عليه في الحياة، طبيًا، دا شيء سيئ، وخطير، قرر إنه يطبق عليّا العرف الأمريكي، ويصارحني بخطورة حالتك الصحية، وإن وجودك معنا مش حيطول، سنة أو اتنين على الأكثر!

الكلام دا كان من حوالي ٣٠ سنة، ”علي“ كان تم أربع سنين، ”ناهد“ فاضلها شهرين وتتم ثلاث سنين، وأنا حامل في ”مو“.

علشان كده، كل سنة جديدة كانت تعدي علينا وإننت معنا، وكل عيد ميلاد، كنت بأعتبره «مايل ستون» في حياتي، وإنجاز يستحق الاحتفال، وقبل كل شيء، نعمة وفضل يستحقوا الشكر والحمد.

الحمد لله ألف مليون مرة.

وبمرور السنين، عديت باختبار ورا التاني، كنت بأهزر معاك وأقولك إنك مريت على الدكاترة في كل التخصصات والحمد لله، الوحيد اللي نفذ منك هو اللي أمه دعتله، فاتخصص نسا!

وبالرغم من كل دا، كنت أكثر واحد قابلته في حياتي محب للحياة، وكنت زي ما عملت من ثلاثين سنة، بتضرب برأي الدكاترة اللي احتاروا في حالتك عرض الحائط،

وتقوم تقف على رجلك، وتشتغل، وتسافر، وتذاكر، وتتفسح، وتتكلم في التليفون، وتعافر، وماتخذش الدواء، وتتعب، فترجع تاخذ الدواء. وقبل ما تتعافى تكون بتخطط لسفر أو خروجة، تقابل أصحاب ومعارف، وتحكي لهم عن المواقف طريفة اللي حصلت لك في السفر أو الفسحة. وتقابل ناس لأول مرة وتبقوا أصحاب، وتتكلم في التليفون، وتسأل على معارفك وقرايبك، وتواعدهم كلهم إنك حتشوفهم، وأعاتبك وأقولك إزاي تواعد الناس دي كلها في الوقت القصير دا. لكن أنت كنت فعلاً بتعرف تشوفهم، واللي معرفتش تشوفه المرة دي، تشوفه المرة اللي جايه. وتتكلم في التليفون، وتسمع باهتمام وحب لشكوى مريض أو قريب أو صديق، وتحاول تساعدهم في إنهم يلاقوا الحل بنفسهم، أو تشركهم في الاختيار ما بين أكثر من حل، وتشتكي من طبعي وحببي في النظافة واللي كنت بتسميها وسوسة، وأنا أشتكي أنك مش بتقضي معايا وقت كافي لإنك دائماً مشغول بمشاكل مرضاك، وأنت تقول بعودك على غيابي، وأتخانق معاك وأقولك بلاش تخلي الموت وسيرته دائماً طرف في النقاش. وأنت تقول بس دا الواقع لإن كل يوم جديد بتعتبره آخر يوم لك، وأنت بقالك سنين عايش كماله، وأغير الموضوع وأكلمك عن الأولاد أو الأحفاد، فالحياة ترجع لعينيك وتسألني حانسافر ملين فيهم، وتسافر، وتتفسح، وترجع، وتشتغل، وتضحك بصوت عالي على فيلم اللمبي. وأقولك: بتضحك على إيه؟ دا سخيف أوي. فتقول: محتاج أفضي عقلي من كل المشاكل اللي بتعامل معاها طول النهار، وما اكتشفت الفاييس بوك، وبعدين الواتس اب، بقيت بتمشي ومعاك التليفون في إيد، والأبي ياد في الإيد الثانية. وبعدين تسألني: كلمت مين من الأولاد، وأخبارهم إيه؟ وحنشوفهم ثاني إمتى، وتكتب قصة قصيرة أو رواية. وتديني الأبي ياد وتقول لي: إقريها لحد ما أرجع من العيادة. وتخرج، وبعدين ترجع علشان نسيت التليفون، وتكلم "أحمد" وتقوله إنك في السكة.

والله، أنا تعبت وأنا بأحاول أفتكرو يومك كان شكله إيه، مش عارفة

أنت كنت بتقدر على المجهود دا كله إزاي؟ وإزاي ضحكت على قلبك الكبير وخليته إستحمل المجهود الجبار دا لأكثر من ثلاثين سنة؟ عند في الدكتور خريج هارفرد؟ ولا حب في الحياة؟ ولا عايز تظمن علينا قبل ما تسيننا؟ ولا عايز تساعد ناس معينين وتحطهم على أول الطريق؟؟

المشكلة دلوقت، إني مش عارفة أتعامل مع غيابك، إحنا سوا من قبل ما يكون عندي ١٨ سنة، ووجودك في دنيتي بقى حياتي، بلوها ومرها، وفجأة...

متلخبطة، أزعل وأعطى واكتئب لإنك مش معانا؟ ولا أفرح لك، علشان ربنا استجاب لك، والنهاية كانت سريعة، وبدون مقدمات مؤلمة، ولا احتياج للاعتماد على غيرك، حتى أقرب الناس لك، وكنت لآخر لحظة واقف على رجلك، وخارج تقابل أصدقاء وزملاء بتحبهم وتقدرهم؟

لكن قبل ماتوصلهم، استسلمت أخيراً للرحيل، بعد ما ضحكت عليه لأكثر من ٣٠ سنة، أكثر من ١١ ألف يوم، أنت اللي كنت بتنتصر فيهم، وبتهزم الرحيل بالرغم من كل الكلام اللي في كُتب الطب.

صحيح المباراة انتهت، بس النتيجة لصالحك.

منصور: حب كبير ودعاء من كل إنسان عرفه.

الرحيل: عتاب كبير من كل إنسان عرف "منصور".

أنا والأولاد والأحفاد بخير، متوحشين عليك بس بنحاول نكون زيك، واخدين الـ fun اللي في الموضوع، أي موضوع، مهما كان مؤلم، وبنداري الحزن في القلب، وينفتكر وبنحب

نتكلم عن كل المواقف العجيبة الي كانت دايمًا بتحصلك،
 وبنضحك، وبندعي إن ربنا يتقبل كل الدعاء بالحب والرحمة
 من أحبابك وأصحابك ومرضاك، أو بلاش كلمة مرضاك
 لإنك كنت شايفهم أصحابك وأحبابك. وإن شاء الله تكون في
 مكان أجمل من أي مكان زرته أو كنت تتمنى زيارته، وتكون
 وسط صحبة جميلة من أحبابك وأصحابك الي سبقوك،
 وبرضة تكون بتحكلهم عنا وعن مغامراتك، وتكون دلوقت
 قادر تعمل كل الي نفسك فيه، وكان قلبك الكبير منعك عنه.
 وإلى اللقاء.





من خلال مواقف فريدة وساخرة ،
عبر رحلة حياتها ، التي امتدت من
الاسكندرية الى تورونتو ، ومن
الظهران الى القاهرة ، تحاول الكاتبة ان
تكتشف السر وراء إحساسها الطاغى ،
وقناعتها
بأنها من كوكب تاني

تصميم الغلاف، وأصمت منصور

كتيبنا
KOTOBNA

